

明

史

二
四

明史卷八十九

志第六十五

總裁官總理事務 經筵講官少保兼李太保和殿學士兼管都戶部尚書事加六級張廷玉等奉

救修

兵一

明以武功定天下革元舊制自京師達於郡縣皆立衛所外統之都司內統於五軍都督府而上十二衛爲天子親軍者不與焉征伐則命將充總兵官調衛所軍領之旣旋則將上所佩印官軍各回衛所蓋得唐府兵遺意文皇北遷一遵太祖之制然內臣觀兵履霜伊始洪宣以後狃於治平故未久而遂有土木之難于謙創立

團營簡精銳一號令兵將相習其法頗善憲孝武世四朝營制屢更而威益不振衛所之兵疲於番上京師之旅困於占役馴至末造尺籍久虛行伍衰耗流盜蜂起海內土崩宦豎降於關門禁軍潰於城下而國遂以亡矣今取其一代規制之詳及有關於軍政者著於篇

京營

侍衛上直軍

皇城守衛
京城巡捕

四衛營

京軍三大營一曰五軍一曰三千一曰神機其制皆備於永樂時初太祖建統軍元帥府統諸路武勇尋改大都督府以兄子文正爲大都督節制中外諸軍京城內

外置大小二場分教四十八衛卒已又分前後中左右五軍都督府洪武四年士卒之數二十萬七千八百有奇成祖增京衛爲七十二又分步騎軍爲中軍左右掖左右哨亦謂之五軍歲調中都山東河南大寧兵番上京師隸之設提督內臣一武臣二掌號頭官二大營坐營官一把總二中營坐營官一馬步隊把總各一左右掖哨官如之又有十二營掌隨駕馬隊官軍設把總二又有圍子手營掌操練上直义刀手及京衛步隊官軍設坐營官一統四司以一二三四爲號把總各二又有幼官舍人營掌操練京衛幼官及應襲舍人坐營官一

四司把總各一此五軍營之部分也已得邊外降丁三千立營分五司一掌執大駕龍旗寶纛勇字旗負御寶及兵仗局什物上直官軍一掌執左右二十隊勇字旗大駕旗纛金鼓上直官軍一掌傳令營旗牌御用監監甲尚冠尚衣尚履什物上直官軍一掌執大駕勇字旗五軍紅盔貼直軍上直官軍一掌殺虎手馬轎及前哨馬營上直明甲官軍隨侍營隨侍東宮官舍遼東備禦回還官軍提督內臣二武臣二掌號頭官二坐司官五見操把總三十四上直把總十六明甲把總四此三千營之部分也已征交趾得火器法立營肄習提督內臣

武臣掌號頭官皆視三千營亦分爲五軍中軍坐營內
臣一武臣一其下四司各監鎗內臣一把司官一把總
官二左右掖哨皆如之又因得都督譚廣馬五千匹置
營名五千下掌操演火器及隨駕護衛馬隊官軍坐營
內臣武臣各一其下四司各把司官二此神機營之分
部也居常五軍肄營陣三千肄巡哨神機肄火器大駕
征行則大營居中五軍分駐步內騎外騎外爲神機神
機外爲長圍周二十里樵採其中三大營之制如此洪
熙時始命武臣一人總理營政宣德五年以成國公朱
勇言選京衛卒隸五軍訓練明年命科道及錦衣官覈

諸衛軍數帝之征高煦及破兀良哈皆以京營取勝焉
正統二年復因勇言令錦衣等衛守陵衛卒存其半其
上直旗校隸錦衣督操餘悉歸三大營土木之難京軍
沒幾盡景帝用于謙爲兵部尚書謙以三大營各爲教
令臨期調撥兵將不相習乃請於諸營選勝兵十萬分
十營團練每營都督一號頭官一都指揮二把總十領
隊一百管隊二百於三營提督中推一人充總兵官監
以內臣兵部尚書或都御史一人爲提督其餘軍歸本
營曰老家京軍之制一變英宗復辟謙死團營罷憲宗
立復之增爲十二成化二年復罷命分一等次等訓練

尋選得一等軍十四萬有奇帝以數多令仍分十二營團練而區其名有奮耀練顯四武營敢果効鼓四勇營立伸揚振四威營命侯十二人掌之各佐以都指揮監以內臣提督亦勤六名其軍曰選鋒不任者仍爲老家以供役而團營之法又稍變二十年立殫忠効義二營練京衛舍人餘丁二營永樂間設後廢至是復設未幾以無益罷帝在位久京營特注意然缺伍至七萬五千有奇大率爲權貴所隱占又用汪直總督團營禁旅專掌於內臣自帝始也孝宗卽位乃命都御史馬文升爲提督是時營軍久苦工役成化末余子俊嘗言之文升

復力陳不可又請於每營選馬步銳卒二千遇警徵調且遵洪永故事五日一操以二日走陣下營以三日演武從之時尚書劉大夏陳弊端十事復奏減修乾清宮卒內臣謂其不恤大工大學士劉健曰愛惜軍士司馬職也帝納之會戶部主事劉夢陽極論役軍之害并及內臣主兵者以語侵壽寧侯下詔獄遂格不行武宗卽位十二營銳卒僅六萬五百餘人稍弱者二萬五千而已給事中葛嵩請選五軍三千營精銳歸團練而存八萬餘人於營以供役惠安伯張偉謬引舊制以爭事遂已隱占如故寘鐠反太監張永將京軍往討中官權益

重及流寇起邊將江彬等得幸請調邊軍入衛於是集九邊突騎家丁數萬人於京師名曰外四家立兩官廳選團營及勇士四衛軍於西官廳操練正德元年所選官軍操於東官廳自是兩官廳軍爲選鋒而十二團營且爲老家矣武宗崩大臣用遺命罷之當是時工作浩繁邊將用事京營戎政益大壞給事中王良佐奉敕選軍按籍三十八萬有奇而存者不及十四萬中選者僅二萬餘世宗立久之從廷臣言設文臣知兵者一人領京營是時額兵十萬七千餘人而存者僅半專理京營兵部尚書李承勛請足十二萬之數部議遵弘治中例

老者補以壯丁逃故者清軍官依期解補從之十五年都御史王廷相提督團營條上三弊一軍士多雜派工作終歲不得入操雖名團營聽征實與田夫無異二軍士替代吏胥需索重賄貧軍不能辦老羸苟且應役而精壯子弟不得收練三富軍憚營操征調率賄將弁置老家數中貧者雖老疲亦常操練語頗切中旣而兩郊九廟諸宮殿之工起役軍益多兵部請分番爲二半團操半放歸而收其月廩雇役詔行一年自後邊警急團營見兵少僅選騎卒三萬仍號東西官廳餘者悉老弱仍爲營帥中官私役二十九年俺答入寇兵部尚書丁

汝夔覈營伍不及五六萬人驅出城門皆流涕不敢前
諸將領亦相顧變色汝夔坐誅大學士嚴嵩乃請振刷
以圖善後吏部侍郎王邦瑞攝兵部因言國初京營勁
旅不減七八十萬元戎宿將常不乏人自三大營變爲
十二團營又變爲兩官廳雖浸不如初然額軍尚三十
八萬有奇今武備積弛見籍止十四萬餘而操練者不
過五六萬支糧則有調遣則無比敵騎深入戰守俱稱
無軍卽見在兵率老弱疲憊市井遊販之徒衣甲器械
取給臨時此其弊不在逃亡而在占役不在軍士而在
將領蓋提督坐營號頭把總諸官多世胄紈袴平時占

役營軍以空名支餉臨操則肆集市人呼舞博笑而已
 先年尚書王瓊毛伯溫劉天和常有意振飭然將領惡
 其害已陰謀阻撓軍士又習於驕惰競倡流言事復中
 止釀害至今乞大振乾綱遣官精核帝是其言命兵部
 議興革於是悉罷團營兩官廳復三大營舊制更三千
 曰神樞罷提督監鎗等內臣設武臣一曰總督京營戎
 政以咸寧侯仇鸞爲之文臣一曰協理京營戎政卽以
 邦瑞充之其下設副叅等官二十六員已又從部議以
 四武營歸五軍營中軍四勇營歸左右哨四威營歸左
 右掖各設坐營官一員爲正兵備城守叅將二員備征

討帝以營制新定告於太廟行之又遣四御史募兵畿輔山東山西河南得四萬人分隸神樞神機各設副將一而增能戰將六員分領操練大將所統三營之兵居常名曰練勇有事更定職名五軍營大將一員統軍一萬總主三營副叅遊擊佐擊及坐營等官副將二員各統軍七千左右前後叅將四員各六千遊擊四員各三千外備兵六萬六千六百六十人神樞營副將二員各統軍六千佐擊六員各三千外備兵四萬人神機營亦如之已又定三大營官數五軍營一百九十六員神樞營二百八員神機營一百八十二員共五百八十六員

在京各衛軍俱分隸三營分之爲三十三營合之爲三大營終帝世其制屢更最後中軍哨掖之名亦罷但稱戰守兵兼立車營故事五軍府皆開府給印主兵籍而不與營操營操官不給印戎政之有府與印自仇鸞始鸞方貴幸言於帝選各邊兵六萬八千人分番入衛與京軍雜練復令京營將領分練邊兵於是邊軍盡隸京師塞上有警邊將不得徵集邊事益壞鸞死乃罷其所置戎政廳首領官之屬而入衛軍則惟罷甘肅者隆慶四年大學士趙貞吉請收將權更營制極言戎政之設府鑄印以數十萬衆統於一人非太祖成祖分府分營

本意請以官軍九萬分五營營擇一將分統訓練詔下
廷臣議尚書霍冀言營制世宗熟慮而後定不宜更惟
大將不當專設戎政不宜有印請如貞吉言制曰可於
是三大營各設總兵一副將二其叅佐等官互有增損
各均爲十人而五軍營兵均配二營營十枝屬二副將
分統以侯伯充總兵尋改曰提督又用三文臣亦稱提
督自設六提督後各持意見遇事旬月不決給事中溫
純言其弊乃罷仍設總督協理二臣萬曆二年從給事
中歐陽栢請復給戎政印汰坐營官二員五年巡視京
營科臣林景暘請廣召募立選鋒是時張居正當國綜

覈名實羣臣多條上兵事大旨在足兵選將營務頗飭久之帝厭政廷臣漸爭門戶習於偷惰遂日廢弛三十年尚書李化龍理戎政條上京營積弊敕下部議卒無所振作及兵事起總督京營趙世新請改設教場城內便演習太常少卿胡來朝請調京軍戍邊可變弱爲強皆無濟於用天啟三年協理侍郎朱光祚奏革老家軍補以少壯老家怨以瓦礫投光祚遂不果革是時魏忠賢用事立內操又增內臣爲監視及把牌諸小內監益募健丁諸營軍多附之莊烈帝卽位撤內臣已而復用戎政侍郎李邦華憤京營弊壞請汰老弱虛冒而擇

材力者爲天子親軍營卒素驕有疑其爲變者勲戚中
官亦惡邦華害已蜚語日聞帝爲罷邦華代以陸完學
盡更其法京營自監督外總理捕務者二員提督禁門
巡視點軍者三員帝皆以御馬監司禮文書房內臣爲
之於是營務盡領於中官矣十年八月車駕閱城鎧甲
旌旗甚盛羣臣悉鸞帶策馬從六軍望見乘輿皆呼萬
歲帝大悅召完學入御幄獎勞酌以金卮然徒爲容觀
而已時兵事益亟帝命京軍出防勦皆監以中官廩給
優渥挾勢而驕多奪人俘獲以爲功輕折辱諸將士將
士益解體周延儒再入閣勸罷內操撤諸監軍京兵班

師還時營將率內臣私人不知兵兵惟注名支糧買替
紛紜朝甲暮乙雖有尺籍莫得而識也帝屢旨訓練然
日不過二三百人未昏遂散營兵十萬倖抽驗不及玩
愒佚罰者無算帝嘗問戎政侍郎王家彥家彥曰今日
惟嚴買替之禁改操練之法庶可救萬一然勢已晚帝
不懌而罷十六年襄城伯李國禎總戎政內臣王承恩
監督京營明年流賊入居庸關至沙河京軍出禦聞礮
聲潰而歸賊長驅犯闕守陴者僅內操之二千人京師
遂陷大率京軍積弱由於占役買閒其弊實起於紕袴
之營帥監視之中官竟以亡國云京營之在南者永樂

北遷始命中府掌府事官守備南京節制在南諸衛所
洪熙初以內臣同守備宣德末設叅贊機務官景泰間
增協同守備官成化末命南京兵部尚書叅贊機務視
五部特重先是京師立神機營南京亦增設與大小二
教場同練軍士常操不息風雨方免有逃籍者憲宗命
南給事御史時至二場點閱成國公朱儀及太監安寧
不便詭言軍機密務御史詰問名數非宜帝爲罪御史
仍令守備叅贊官閱視著爲令嘉靖中言者數奏南營
耗亡之弊二十四年冬詔立振武營簡諸營銳卒充之
益以淮揚趨捷者江北舊有池河營專城守護陵寢二

營兵各三千領以勲臣別設場訓練然振武營卒多無賴子督儲侍郎黃懋官抑削之遂譁毆懋官至死詔誅首惡以戶部尚書江東爲叅贊東多所寬假衆益驕無復法紀給事中魏元吉以爲言因舉浙直副總兵劉顯往提督未至池河兵再變毆千戶吳欽詔顯亟往許以川兵五百自隨事始定隆慶改元罷振武營以其卒千餘仍隸二場及神機營萬曆十一年叅贊尚書潘季馴言操軍原額十有二萬今僅二萬餘祖軍與選充叅半選充例不補營伍由是虛請如祖軍收補已而王璘代季馴言大小二場新舊官軍二萬三千有餘請如北京

各邊三千一百二十八爲一枝每枝分中左右哨得兵七枝餘置旗鼓下備各營缺從之巡視科臣阮子孝極論南營耗弊言頗切中然卒無振飭之者已從尚書吳文華請增叅贊旗牌得以軍法從事兼聽便宜調遣三十一年添設南中軍標營選大教場卒千餘設中軍叅將統練規制雖具而時忸苟安闢茸一如北京及崇禎中流寇陷廬鳳踞上流有窺留都意南中將士日夜惴惴以護陵寢守京城爲名倖賊不東下而已最後史可法爲叅贊尚書思振積弊未久而失蓋無可言焉

侍衛上直軍之制太祖卽吳王位其年十二月設拱衛

司領校尉隸都督府洪武二年改親軍都尉府統中左右前後五衛軍而儀鑾司隸焉五年造守衛金牌銅塗金爲之長一尺闊三寸以仁義禮智信爲號二面俱篆文一曰守備一曰隨駕掌於尚寶司衛士佩以上直下直納之十五年罷府及司置錦衣衛所屬有南北鎮撫司十四所所隸有將軍力士校尉掌直駕侍衛巡察緝捕已又擇公侯伯都督指揮之嫡次子置勲衛散騎舍人而府軍前衛及旗手等十二衛各有帶刀官錦衣所隸將軍初名天武後改稱大漢將軍凡千五百人設千百戶總旗七員其衆自爲一軍下直操練如制缺至五

十人方補月精二石積勞試補千百戶亡者許以親子
弟魁梧材勇者代無則選民戶充之永樂中置五軍三
千營增紅盔明甲二將軍及义刀圍子手之屬備宿衛
校尉力士僉民間丁壯無惡疾過犯者力士先隸旗手
衛後改隸錦衣及騰驤四衛專領隨駕金鼓旗幟及守
衛四門校尉原隸儀鑾司司改錦衣衛仍隸焉掌擎執
鹵簿儀仗曰鑾輿曰擎蓋曰扇手曰旌節曰旛幢曰班
劍曰斧鉞曰戈戟曰弓矢曰馴馬凡十司及駕前宣召
差遣三日一更直設總旗小旗而領以勛戚官官凡六
管大漢將軍及散騎舍人府軍前衛帶刀官者一管五

軍營義刀圍子手者一管神樞營紅盔將軍者四聖節
正旦冬至及大祀誓戒冊封遣祭傳制用全直直三千
人餘則更番器仗衣服位列亦稍殊焉凡郊祀經筵巡
幸侍從各有定制詳禮志中居常當直將軍朝夕分候
午門外夜則司更共百人而五軍義刀官軍悉於皇城
直宿掌侍衛官輪直日一員惟掌錦衣衛將軍及義刀
手者每日侍尤嚴收捕之令及諸脫更離直者共計錦
衣衛大漢將軍一千五百七人府軍前衛帶刀官四十
神樞營紅盔將軍二千五百把總指揮十六明甲將軍
五百二把總指揮二大漢將軍八五軍營義刀圍子手

三千把總指揮八勲衛散騎舍人無定員旗手等衛帶刀官一百八十此侍衛親軍大較也正統後妃主公侯中貴子弟授官者多寄祿錦衣中正德時奏帶傳陞冒銜者又不下數百人武宗好養勇士嘗以千把總四十七人注錦衣衛帶俸舍餘千一百人充御馬監家將勇士食糧騎操又令大漢將軍試百戶五年實授著爲令倖竇開而恩澤濫宿衛稍輕矣至萬曆間衛士多占役買閒其弊亦與三大營等雖定離直者奪月糈之例然不能革太祖之設錦衣也專司鹵簿是時方用重刑有罪者往往下錦衣衛鞠實本衛叅刑獄自此始文皇入

立倚錦衣爲心腹所屬南北兩鎮撫司南理本衛刑名及軍匠而北專治詔獄凡問刑奏請皆自達不關白衛帥用法深刻爲禍甚烈詳刑法志又錦衣緝民間情僞以印官奉敕領官校東廠太監緝事別領官校亦從本衛撥給因是恒與中官相表裏皇城守衛用二十二衛卒不獨錦衣軍而門禁亦上直中事京城巡捕有專官然每令錦衣官協同地親權要遂終明之世云初太祖取婺州選富民子弟充宿衛曰御中軍已置帳前總制親兵都指揮使後復省置都鎮撫司隸都督府總牙兵巡徼而金吾前後羽林左右虎賁左右府軍左右前後

十衛以時番上號親軍有請得自行部不關都督府及
定天下改都鎮撫司爲留守設左右前後中五衛關領
內府銅符日遣二人點閱夜亦如之所謂皇城守衛官
軍也二十七年申定皇城門禁約凡朝叅門始啟直日
都督將軍及帶刀指揮千百戶鎮撫舍人入後百官始
以次入上直軍三日一更番內臣出入必合符嚴索以
金幣出者驗視勘合以兵器雜藥入門者禽治失察者
重罪之民有事陳奏不許固遏帝念衛士勞苦令家有
婚喪疾病產子諸不得已事得自言情家無餘丁父母
俱病者許假侍養愈乃復先是新宮成詔中書省曰軍

士戰鬪傷殘難備行伍可於宮牆外造舍以居之晝則治生夜則巡警其後定十二衛隨駕軍上直者人給錢三百二十八年復於四門置舍使恩軍爲衛士執爨恩軍者得罪免死及諸降卒也永樂中定制諸衛各有分地自午門達承天門左右逮長安左右門至皇城東西屬旗手濟陽濟川府軍及虎賁右金吾前燕山前羽林前八衛東華門左右至東安門左右屬金吾羽林府軍燕山四左衛西華門左右至西安門左右屬四右衛元武門左右至北安門左右屬金吾府軍後及通州大興四衛衛有銅符頒自太祖曰承曰東曰西曰北各以其

門名也巡者左半守者右半守官遇巡官至合契而從事各門守衛官夜各領銅令申字牌巡警自一至十六內皇城衛舍四十外皇城衛舍七十二俱設銅鐸次第循環內皇城左右坐更將軍百每更二十人四門支更官八交互往來鈐印于籍以爲驗都督及帶刀千百戶日各一人領申字牌直宿及點各門軍士後更定都督府改命侯伯僉書焉洪熙初更造衛士懸牌時親軍缺伍衛士不獲代帝命選他衛軍守端直諸門尚書李慶謂不可帝曰人主在布德以屬人心苟心相屬雖非親幸何患焉宣德三年命御史點閱衛卒天順中復增給

事巾一人成化十年尚書馬文升言太祖置親軍指揮使司不隸五府文皇帝復設親軍十二衛又增勇士數千員屬御馬監上直而以腹心臣領之比者日廢弛勇士與諸營無異皇城之內兵衛無幾諸監門卒尤疲羸至不任受甲宜敕御馬監官卽見軍選練仍敕守衛官常嚴步伍譏察出入以防微銷萌帝然其言亦未能有所整飭正德初嚴皇城紅舖巡徼日令留守衛指揮五員督內外夜巡軍而兵部郎中主事各一人同御史錦衣衛稽閱毋攝他務嘉靖七年增直宿官軍衣糧五年一給萬曆十一年於皇城內外設把總二員分東西管

理時門禁益弛衛軍役於中官每至空伍賃市兒行丐
應點閱叉刀紅盔日出始一入直直廬虛無人坐更將
軍皆納月鏹於所轄凡提號巡城印簿走更諸事悉廢
十五年再申門禁久之給事中吳文煒乞盡復舊制不
報末年有失金牌久之始覺者挺擊之事張差一妄男
子得闖入殿廷其積弛可知是後中外多事啟禎兩朝
雖屢申飭竟莫能挽侵尋以至於亡京城巡捕之職洪
武初置兵馬司譏察奸僞夜發巡牌旗士領之覈城門
扃鑰及夜行者已改命衛所鎮撫官而掌於中軍都督
府永樂中增置五城兵馬司宣德初京師多盜增官軍

百人協五城逐捕已復增夜巡候卒五百成化中始命錦衣官同御史督之末年撥給團營軍二百弘治元年令三千營選指揮以下四員領精騎巡京城外又令錦衣官五旗手等衛官各一分地巡警巡軍給牌五年設把總都指揮專職巡捕正德中添設把總分畫京城外地南抵海子北抵居庸關西抵蘆溝橋東抵通州復增城內二員而益以團營軍定官卒賞罰例末年邏卒增至四千人特置叅將嘉靖元年復增城外把總一員并舊爲五分轄城內東西二路城外西南東南東北三路增營兵爲五千又十選一立尖哨五百騎厚其月糈命

叅將督操而監以兵部郎是時京軍弊壞積久捕營亦然三十四年軍士僅三百餘以給事中邱岳等言削指揮樊經職而禁以軍馬私役騎乘萬曆十二年從兵部議京城內外盜發自卯至申責兵馬司自酉至寅責巡捕官賊衆則協力捕勦是後軍額倍增駕出及朝審錄囚皆結隊駐巷口籍伍雖具而士馬實凋弊不足用捕營提督一叅將二把總十八巡軍萬一千馬五千匹盜賊縱橫至竊內中器物獲其橐索竟不能得也莊烈帝時又以兵部左侍郎專督然營軍半虛廩馬多雇人騎失盜嚴限止五日玩法卒如故

四衛營者永樂時以迤北逃回軍卒供養馬役給糧授室號曰勇士後多以進馬者充而聽御馬監官提調名隸羽林身不隸也軍卒相冒支糧不可稽宣德六年乃專設羽林三千戶所統之凡三千一百餘人尋改武驤騰驤左右衛稱四衛軍選本衛官四員爲坐營指揮督以太監別營開操稱禁兵器械衣甲異他軍橫於輦下往往爲中官占匿弘治末勇士萬一千七百八十人旗軍三萬一百七十人歲支廩粟五十萬孝宗納廷臣言覈之又令內臣所進勇士必由兵部驗送乃給廩五年籍其人數著爲令省度支金錢歲數十萬武宗卽位中

官甯瑾乞留所汰人數言官及尚書劉大夏持不可不聽後兩官廳設遂選四衛勇士隸西官廳掌以邊將江彬太監張永等世宗入立詔自弘治十八年存額外悉裁之替補必兵部查駁而御馬監馬牛羊令巡視科道覈數既而中旨免覈馬多虛增後數年御馬太監閔洪復矯旨選四衛官給事中鄭自璧劾其欺蔽不報久之兵部尚書李承勛請以選覈仍隸本部中官謂非便帝從承勛言十六年又命收復登極詔書所裁者凡四千人後五年內臣言勇士僅存五千餘請令子姪充選以備邊警部臣言故額定五千三百三十人八年清稽已

浮其數且此營本非爲備邊設者帝從部議然隱射占役冒糧諸弊率如故萬曆二年減坐營官二員已復定營官缺由兵部擇用其後復爲中官所撓仍屬御馬監廷臣多以爲言不能從四十二年給事中姚宗文點閱本營言官勇三千六百四十七僅及其半馬一千四十三則無至者官旗七千二百四十止四千六百餘馬亦如之乞下法司究治帝不能問天啓末巡視御史高弘圖請視三大營例分弓弩短兵火器加以訓練至莊烈帝時提督內臣曹化淳奏改爲勇衛營以周遇吉黃得功爲帥遂成勁旅出擊賊輒有功得功軍士畫虎頭於

皂布以衣甲賊望見黑虎頭軍多走避其得力出京營
上云

明史卷八十九終

明史卷九十

志第六十六

總裁官總理事務 經筵講官少保兼太子太保和殿大學士兼管部戶部尚書加級張廷玉等奉

敕修

兵二

衛所

班軍

太祖下集慶路爲吳王罷諸翼統軍元帥置武德龍驤
豹韜飛熊威武廣武興武英武鷹揚驍騎神武雄武鳳
翔天策振武宣武羽林十七衛親軍指揮使司革諸將
襲元舊制樞密平章元帥總管萬戶諸官號而覈其所
部兵五千人爲指揮千人爲千戶百人爲百戶五十人

爲總旗十人爲小旗天下既定度要害地係一郡者設所連郡者設衛大率五千六百人爲衛千一百二十人爲千戶所百十有二人爲百戶所所設總旗二小旗十大小聯比以成軍其取兵有從征有歸附有謫發從征者諸將所部兵既定其地因以留戍歸附則勝國及僭僞諸降卒謫發以罪遷隸爲兵者其軍皆世籍此其大畧也洪武三年陞杭州江西燕山青州四衛爲都衛復置河南西安太原武昌四都衛四年造用寶金符及調發走馬符牌用寶符爲小金牌二中書省大都督府各藏其一有詔發兵省府以牌入內府出寶用之走馬符

牌鐵爲之共四十金字銀字者各半藏之內府有急務調發使者佩以行尋改爲金符凡軍機文書自都督府中書省長官外不許擅奏有詔調軍省府同覆奏然後納符請寶五年置親王護衛指揮使司每府三護衛衛設左右中前後五所所千戶二百戶十圍子手所二所千戶一七年申定兵衛之政征調則統於諸將事平則散歸各衛八年改在京留守都衛爲留守衛指揮使司在外都衛爲都指揮使司凡十三北平陝西山西浙江江西山東四川福建湖廣廣東廣西遼東河南又行都指揮使司二甘州大同俱隸大都督府九年選公侯都

督各衛指揮嫡長次子爲散騎叅侍舍人隸都督府充宿衛或署各衛所事十三年丞相胡惟庸謀反誅革中書省因改大都督府爲五分統諸軍司衛所明年復置中都留守司及貴州雲南都指揮使司十五年三月頒軍法定律十六年詔各都司上衛所城池水陸地里圖二十年置大寧都指揮使司是年命兵部置軍籍勘合載從軍履歷調補衛所年月在營丁口之數給內外衛所軍士而藏其副於內府三十年定武官役軍之制指揮同知僉事四千戶三百戶鎮撫二皆取正軍三日一番上下直歸伍操練衛所直廳六守門二守監四守庫

一皆任老軍歲一更建文帝嗣位置河北都司湖廣行都司文皇入立皆罷之而陞燕山三護衛爲親軍並建文時所立孝陵衛皆不隸五府後諸陵設衛皆如之移山西行都司所屬諸衛軍於北平設衛屯種永樂元年罷北平都司設留守行後軍都督府遷大寧都司於保定明年更定衛所屯守軍士臨邊險要者守多於屯在內平僻或地雖險要而運輸難至者皆屯多於守七年置調軍勘合以勇敢鋒銳神奇精壯強毅克勝英雄威猛十六字編百號制敕調軍及遣將比號同方准行十八年北京建在南諸衛多北調宣德五年從平江伯陳

瑄言以衛官職漕運東南之卒由是困八年減衛軍餘丁正軍外每軍留一餘悉遣歸已復以幼軍備操者不足三丁至七八丁者選一餘聽治生給軍裝正軍有故卽令補伍毋再勾攝當是時都指揮使與布按並稱三司爲封疆大吏而專閫重臣文武亦無定職世猶以武爲重軍政修飭正德以來軍職冒濫爲世所輕內之部科外之監軍督撫疊相彈壓五軍府如贅疣弁帥如走卒總兵官領敕於兵部皆踦間爲長揖卽謂非體至於末季衛所軍士雖一諸生可役使之積輕積弱重以隱占虛冒諸弊至舉天下之兵不足以任戰守而明遂亡

矣崇禎三年范景文以兵部侍郎守通州上言祖制邊腹內外衛所基置以軍隸衛以屯養軍後失其制軍外募民爲兵屯外賦民出餉使如鱗尺籍不能爲衝鋒之事并不知帶甲之人陛下百度振刷豈可令有定之軍數付之不可問有用之軍糈投之不可知因條上清覈數事不果行初洪武二十六年定天下都司衛所共計都司十有七留守司一內外衛三百二十九守禦千戶所六十五及成祖在位二十餘年多所增改其後措置不一今區別其名於左以資考鏡

上十二衛

金吾前衛

金吾後衛

羽林左衛

羽林右衛

府軍衛

府軍左衛

府軍右衛

府軍前衛 府軍後衛 虎賁左衛 錦衣衛 旗手衛

五軍都督府所屬衛所

左軍都督府在京

凡本府在京屬衛曾經永樂十八年調守北京者各註其下曰調北京其

年月不重出後四府同 驍騎右衛調北京 龍虎衛調

北京 英武衛 瀋陽右衛調北京 在外浙江都司 杭州前衛

衛 昌國衛 台州衛 寧波衛 處州衛 紹興衛 海寧衛

定海衛 海門衛 盤石衛 臨山衛 松門衛 金鄉衛 遼

東都司 衛 定遼左衛 嚴州千戶所 觀海衛 海寧千戶 遼

衛 遼海衛 三萬衛 廣寧左屯衛 復州衛 義州衛

廣寧前屯衛 廣寧後屯衛 山東都司 青州左護衛後

廣寧中護衛後改為屯衛

青州護衛革 兗州護衛革 兗州左護衛後爲臨清
衛 登州衛 青州左衛 萊州衛 寧海衛 濟南

衛 平山衛 德州衛後改屬後府 樂安千戶所後
改名武定屬後府 膠州千戶所 諸城千戶所 滕

縣千戶所

右軍都督府在京 虎賁右衛調北京 留守右衛調北
京 水軍右衛 武德衛調北京

廣武 在外雲南都司 雲南左衛 雲南右衛 雲南前
衛 大理衛 楚雄衛 臨安衛

景東衛 曲靖衛 金齒衛 洱海衛 蒙化衛
馬隆衛改雲南右護衛革 平夷衛 越州衛 六京

衛 鶴慶 貴州都司 貴州衛 永寧衛 普定衛 平
千戶所革 越衛 烏撒衛 普安衛 層臺

衛革 赤水衛 威清衛 龍里衛 安南衛 都勻衛
平壩衛 安莊衛 興隆衛 新添衛 清平

畢節衛 四川都司 成都左護衛 成都右護衛後
黃平千戶所 爲龍虎左衛隸南京左府 成都左衛革

都中護衛後爲豹韜左衛隸南京前府 成都左衛革
成都右衛 成都前衛 成都後衛 成都中衛

寧川衛 茂州衛 建昌衛後屬行都司 重慶衛
叙南衛 蘇州衛後爲寧番衛屬行都司革 瀘州衛

松潘軍民指揮使司 嚴州衛革 青川
千戶所 威州千戶所 大渡河千戶所 陝西都司

西安左護衛後爲神武右衛 西安右護衛 西安中
護衛後爲神武前衛 西安左衛 西安右衛改西安

中護衛 西安前衛 西安後衛 華山衛改西安左
護衛又改神武右衛 泰山衛改西安右護衛 延安

衛 綏德衛 平涼衛 慶陽衛 寧夏衛 臨洮衛
鞏昌衛 西寧衛後屬行都司 漢中衛 涼州衛

後屬行都司 莊浪衛後屬行都司 蘭州衛 秦州
衛 岷州軍民指揮使司 洮州衛 河州軍民指揮

使司 甘肅衛後爲甘州後衛 山丹衛後屬行都司
永昌衛後屬行都司 鳳翔千戶所 金州千戶所

寧夏中護衛 西河中 廣西都司 桂林左衛後爲廣
護衛後改雲南中護衛革 廣西都司 西護衛 桂林右

衛 桂林中衛 南寧衛 柳
州衛 馴象衛 梧州千戶所

中軍都督府在京 留守中衛調北京 神策衛調北京
廣洋衛 應天衛調北京 和陽

衛調北京牧馬在外直隸揚州衛和州衛後改爲
千戶所調北京

淮安衛鎮海衛
壽州衛邳州衛
儀真衛大河衛
沂州衛太倉衛
泗州衛新

安衛蘇州衛
儀真衛徐
中都留守司
鳳陽右衛
鳳陽中

州衛安慶衛
宿州千戶所
中都留守司
鳳陽中

衛皇陵衛
鳳陽衛
留守左衛
留守
河南都司

中衛長淮衛
懷遠衛
洪塘千戶所
留守
河南都司

歸德衛後屬中府
潼關衛後屬中府
弘農衛
汝寧衛後改
千戶所屬中府

衛宣武衛
信陽衛
彰德衛
武平衛後屬中府
南陽衛
寧國衛後爲
涿鹿後衛
懷慶

衛寧山衛後屬後府
潁州衛
安吉衛後爲通州
衛親軍
潁上千戶所
河南左護衛
河南中護衛

河南右護衛三
護衛後并彭城衛
前軍都督府在京
天策衛後分爲保安衛及保安右衛
龍驤衛調北京
豹韜衛調北京

龍江衛後改爲龍江
在外直隸九江
湖廣都司
武昌
左衛
飛熊衛調北京
衛

武昌左衛	黃州衛	永州衛	岳州衛	蘄州衛
施州衛	長沙護衛	辰州衛	安陸衛	後屬行都
司改承天衛	襄陽衛	襄陽護衛	後俱屬行都	司
常德衛	沅州衛	寶慶衛	沔陽衛	後屬興都留守
司長沙衛	沅陵衛	衡州衛	瞿塘衛	後屬行都
司鎮遠衛	平溪衛	清浪衛	偏橋衛	五開衛
顯陵衛	荊州左護衛	後爲荊州左衛	屬行都	司改
千戶所	夷陵千戶所	後屬行都司	忠州千戶所	後屬
德安千戶所	安福千戶所	麻寮千戶所	枝江千戶所	後屬
行都司	西平千戶所	道州千戶所	大庸千戶所	後屬
屬行都司	武岡千戶所	崇山千戶所	長寧千戶所	後屬
戶所後屬行都司	武昌左右中三護衛	左改東昌衛	福	
右改徐州左衛	福建都司	福州中衛	興化衛	泉州衛
中改武昌護衛	福建都司	鎮東衛	鎮海衛	福建行都司
漳州衛	福寧衛	鎮東衛	鎮海衛	福建行都司
平海衛	永寧衛	鎮東衛	鎮海衛	建寧左衛
衛建陽衛	汀州衛	延平衛	邵	江西都司
武衛	汀州衛	將樂千戶所	南昌左衛	南昌前衛

袁州衛 贛州衛 吉安衛 後爲千戶所 饒州千戶所
所 安福千戶所 會昌千戶所 永新千戶所 南

安千戶所 建昌千戶所 撫州千戶所 廣東都司 廣州前
戶所 鉛山千戶所 廣信千戶所 衛 廣

州左衛	廣州右衛	南海衛	潮州衛	雷州衛
海南衛	清遠衛	惠州衛	肇慶衛	廣州後衛

程鄉千戶所 高州千戶所 廉州千戶所 後爲廉州
衛 萬州千戶所 儋州千戶所 崖州千戶所 南

雄千戶所 韶州千戶所 德慶千戶所 新興千戶所
戶所 陽江千戶所 新會千戶所 龍川千戶所

後軍都督府在京

衛
革
在外北平都司
燕山左衛
燕山右衛
燕山前衛
大興左衛
永清左衛
永清右衛

衛濟川衛濟陽衛彭城衛通州衛已上俱改
爲親軍薊州衛密雲衛後爲密雲衛屬後府

眞定衛 永平衛 山海衛 遵化衛 居北平行都
庸關千戶所後爲隆慶衛已上俱屬後府

司後爲大寧都司大寧左衛大寧右衛二衛後爲
營州左右護衛改延慶左右衛大寧中衛大寧

前衛 大寧後衛後爲營州中護衛改寬河衛 會川
衛俱改調京衛已上俱屬後府 營州中護衛 興州

中護 山西都司 太原左衛 太原右衛 太原前衛
衛革 振武衛 平陽衛 鎮西衛 潞州衛

千戶所 寧化千戶所 廣昌千戶所 沁州 山西行都司 大同
左衛 大同右衛 雁門千戶所 山西行都司 大同

前衛 蔚州衛 朔州衛 北平三護衛 燕山左護衛
燕山中護衛 蔚州衛 朔州衛 北平三護衛 燕山左護衛

俱爲親軍 山西三護衛 太原左護衛 太原右護
衛 太原中護衛 俱革

後定天下都司衛所共計都司二十一留守司二內外

衛四百九十三守禦屯田羣牧千戶所三百五十九儀

衛司三十三 自儀衛司以下舊 宣慰使司二招討使司

二宣撫司六安撫司十六長官司七十 原五番邊都司

衛所等四百七 後作四百 六十三

親軍上二十二衛舊制止十二衛後增設金吾左以下

十衛俱稱親軍指揮使司不屬五府又設騰驤等四衛

亦係親軍并武功永清彭城及長陵等十五衛俱不屬

府

金吾前衛

金吾後衛

羽林左衛

羽林右衛

府

軍後衛

虎賁左衛

錦衣衛

旗手衛

已上舊為上

平三護衛

洪武三十五年陞

燕山左衛

濟川衛

燕山右衛

衛舊為

安吉衛

已上北平都司七衛

永樂四年陞俱為

親軍

左衛

武驤右衛

已上四衛

宣德八年以各衛養馬軍

士及神武前衛官軍開設

武功左衛

宣德二年設

武功右衛

宣德六年設

永清左衛

三護衛

宣德初復為本衛

又併河南三護衛

多餘官軍

於彭城衛

年改 獻陵衛舊武成左衛宣德元年改 景陵衛舊
武成右衛宣德十年改 裕陵衛舊武成前衛天順八
年改 茂陵衛舊武成後衛成化二十三年改 泰陵
衛舊忠義左衛弘治十八年改 康陵衛舊義勇中衛
正德十六年改 永陵衛舊義勇左衛嘉靖二十七年
改 昭陵衛舊神武後衛隆慶六年改 定陵衛 慶
陵衛 德陵衛 奠靖千戶所嘉靖二十一年設
犧牲千戶所屬太常寺轄已上俱不屬五府

五軍都督府所屬衛所

左軍都督府在京

留守左衛 龍虎衛

鎮南衛 瀋陽左衛

驍騎右衛 瀋陽右衛俱

南京舊制永樂十八年分調

在外浙江都司

杭州前衛 台州衛

杭州後衛 寧波衛

處州衛

紹興衛

海寧衛

昌國衛

溫州衛

臨

山衛

松門衛

金鄉衛

海門衛

定海衛

盤石

衛所

觀海衛

海寧千戶所

衢州千戶所

嚴州千

戶所

戶所

湖州千戶所

金華千戶所

澈浦千戶所

三

江千戶所

下各所

舊無後添設

乍浦千戶所

定海

中

千戶

定海

後千戶所

定海

中

千戶

所

丸

戶山東都司舊有青州左護衛後改天津右衛舊有貴

所寧海衛濟南衛平山衛威海衛成山下添設

靖海衛東昌衛臨清衛充州左衛後改任城衛

濟寧衛舊武昌左護衛後改充州護衛膠州千

戶所諸城千戶所滕縣千戶所肥城千戶所已

下添設海陽千戶所東平千戶所寧津千戶所

雄崖千戶所浮山前千戶所福山中前千戶所

奇山千戶所濮州千戶所金山左千戶所尋

山後千戶所百尺崖後千戶所王徐寨前千戶所

夏河寨前千戶所魯府儀衛司德府儀衛司

涇府儀衛司衛府儀衛司德府羣牧所

牧所涇府羣牧所衛府羣牧所

右軍都督府在京留守右衛虎賁右衛武德衛

外直隸無後設陝西都司舊有階州衛沙州衛靈山

護衛舊泰山衛改西安左衛西安前衛西安後

衛延安衛漢中衛平涼衛綏德衛寧夏衛

慶陽衛 鞏昌衛 臨洮衛 蘭州衛 秦州衛

岷州衛舊軍民指揮使司嘉靖二十四年添設岷州衛

十年革後存衛 河州衛舊軍民指揮使司 洮州衛

寧夏中護衛 甘肅中護衛 安東中護衛 寧夏

前衛已下各衛舊無後設 寧夏中衛 寧夏中屯衛

舊和州衛 寧夏左屯衛 寧夏右屯衛 寧夏中屯衛

靖虜衛 固原衛 榆林衛 寧夏後衛以花馬池千

戶所改 興安千戶所舊金州千戶所萬曆十年改

鳳翔千戶所 禮店前千戶所已下各所舊設 沔縣

千戶所 環縣千戶所 文縣千戶所 階州千戶所

舊屬秦州衛嘉靖二十二年改屬都司 靈州千戶所

西安千戶所 西固成千戶所 歸德千戶所 鎮

羌千戶所 安邊千戶所 平虜千戶所 興武營千

戶所 鎮戎千戶所 寧夏平虜千戶所 秦府儀衛

司 慶府儀衛司 肅府儀衛司 韓府儀衛司 陝西

寧夏羣牧所 安東羣牧所 甘肅羣牧所 陝西

行都司 洪武十二年添設 甘肅左衛 甘肅右衛

甘肅衛分設 永昌衛 涼州衛 莊浪衛 西寧衛

山丹衛已上舊屬陝西都司 肅州衛 鎮番衛

鎮夷千戶所	高臺千戶所	古浪千戶所	四川都司	舊有浦江關軍民千戶所後革	成都左
護衛	成都右衛	茂州衛	成都中衛	成都前衛	成都後
寧川衛	重慶衛	松潘衛	舊為軍民指揮使司後	瀘州衛	
利州衛	舊無後設	保寧千戶所	廣安千戶所	威州千戶所	雅
改	青川千戶所	大渡河千戶所	黔江千戶所	蜀府儀衛	土官
州千戶所	大渡河千戶所	黔江千戶所	廣安千戶所	壘溪千戶所	灌縣千戶所
戶所已下各所後設	黔江千戶所	廣安千戶所	壘溪千戶所	灌縣千戶所	天全六番招討
建武千戶所	小河西千戶所	壽府羣牧所	革	土官	番招討
司	壽府儀衛司	革	壽府羣牧所	革	土官
官司屬都司	隴木頭長官司	石柱宣撫司	靜州長官司	西陽宣撫	岳希
蓬長官司	司已上屬茂州衛	石柱宣撫司	靜州長官司	西陽宣撫	岳希
司已上屬重慶衛	石耶洞長官司	邑梅洞長官司	蠟匠簇		
已上屬西陽宣撫司	占藏先結簇長官司	邑梅洞長官司	蠟匠簇		
長官司	白馬路簇長官司	山洞簇長官司	麥匪簇長官司	阿昔	
洞簇長官司	北定簇長官司	山洞簇長官司	麥匪簇長官司	阿昔	
多簇長官司	牟力簇長官司	班班簇長官司	祈		
命簇長官司	勒都簇長官司	色藏簇長官司	祈		
思簇長官司	思曩兒簇長官司	阿用簇長官司	祈		
潘幹寨長官司	思曩兒簇長官司	阿用簇長官司	祈		
入郎安撫司	阿角寨安撫司	祈			
府					

兒叵安撫司 芒兒者安撫司已上俱屬松潘衛 四川
疊溪長官司 鬱卽長官司已上屬疊溪千戶所

行都司 舊無後設舊有建昌前衛後革 建昌衛後屬
四川都司 寧番衛舊爲四川蘇州衛已下添

設 會州衛 鹽井衛 越嶲衛 禮州後千戶所
禮州中千戶所 建昌打冲河中前千戶所 德昌

千戶所 迷易千戶所 鹽井打冲河中左千
戶所 冕山橋後千戶所 鹽鎮西後千戶所 土官州

長官司 威龍長官司 普濟長官司 俱屬建昌衛
馬喇長官司 屬鹽井衛 印部長官司 屬越嶲衛 廣

西都司 桂林右衛 桂林中衛 南寧衛 柳州衛
馴象衛 南丹衛 已下添設 慶遠衛 潯州

衛 奉議衛 廣西護衛 梧州千戶所 懷集千戶
所 武緣千戶所 古田千戶所 貴縣千戶所 賀

縣千戶所 全州千戶所 太平千戶所 象州千戶
所 平樂千戶所 鬱林千戶所 賓州千戶所 來

賓千戶所 富川千戶所 容縣千戶所 融縣千戶
所 灌陽千戶所 河池千戶所 武宣千戶所 向

武千戶所 五屯屯出千戶所 遷 雲南都司 舊有鶴
江屯田千戶所 靖江府儀衛司 慶通海

二千戶所革	雲南左衛	雲南右衛	雲南前衛
大理衛	楚雄衛	臨安衛	景東衛
海衛	永昌衛	舊爲金齒軍民指揮使司	蒙化衛
平夷衛	越州衛	六涼衛	雲南中衛
已下後設	廣南衛	大羅衛	瀾滄衛
指揮使司改	騰衝衛	以騰衝軍民指揮使司改	安
寧千戶所	宜良千戶所	易門千戶所	楊林堡千
戶所	十八寨千戶所	通海前千戶所	姚安千戶
右千戶所	定遠千戶所	武定千戶所	木密關千戶
所	姚安中屯千戶所	馬隆千戶所	所
所	鎮安千戶所	舊爲金齒千戶所	萬曆十三年改駐
守猛淋	鎮姚千戶所	舊爲永昌千戶所	萬曆十三年
改駐守老姚關	永平前千戶所	永平後千戶	土
戶所	騰衝千戶所	新安千戶所	鳳梧千戶所
官	茶山長官司	潞江安撫司	鳳溪長官司
長官司	鎮道安撫司	楊塘安撫司	俱屬永昌衛
蠻莫安撫司	猛臉長官司	改設	貴州都司
猛養長官司	俱萬曆十三年改設	貴州都司	舊有層臺
戶所	俱革舊有平伐長官司	後隸貴陽府	舊有平浪九
名九姓獨山州	二長官司	後隸都勻府	貴州衛
永			

寧衛 普定衛 平越衛 烏撒衛 普安衛 赤水衛 威清衛 興隆衛 新添衛 清平衛 平壩衛

安莊衛 龍里衛 安南衛 都勻衛 畢節衛 貴州前衛舊無後改 黃平千戶所 普市千戶所

重安千戶所 安龍千戶所 阿落密千戶所 摩泥千戶所 關索嶺千戶所 白撒千戶所 平夷千戶所

所 安南千戶所 樂民土官 新添長官司 小平伐千戶所 七星關千戶所 長官司 把平寨長官

司 丹平長官司 丹行長官司 已上屬新添衛 楊義長官司屬平越衛 大平伐長官司屬龍里衛

中軍都督府在京 留守中衛 神策衛 應天衛 和 陽衛俱南京舊衛 永樂十八年調

牧馬千戶所南京舊所 在外直隸 儀真衛 高郵衛 蕃牧千戶所添設 蘇州衛 太倉衛 金

鎮海衛 新安衛 泗州衛 壽州衛 邳州衛 大河 山衛 泗州衛 舊為千戶所 潼關

衛 沂州衛 安慶衛 宿州衛 武平衛 鎮江衛 衛 已下舊屬河南都司 歸德衛 武平衛 鎮江衛

已下添設 廬州衛 六安衛 徐州左衛 建陽衛 汝寧千戶所 松江中千戶所 青村中前千戶所

南匯嘴中後千戶所 嘉興中左千戶所在府 吳淞江千戶所 寶山千戶所 劉河堡中千戶所 崇明

沙千戶所 興化千戶所 東海中千戶所 通州千戶所 泰州千戶所 鹽城千戶所 鳳陽中千戶所 鳳陽右

所 莒州 中都留守司 鳳陽衛 皇陵衛 鳳陽中衛 鳳陽右千戶所 留守左衛 鳳陽右

守中衛 長淮衛 懷 河南都司 舊有洛陽中護衛後遠衛 洪塘千戶所 懷 河南都司 併汝州衛 河南衛

彰德衛 弘農衛 陳州衛 睢陽衛 宣武衛 信陽衛 彰德衛 南陽衛 南陽中護衛 南陽衛 南陽中護衛

已下添設 汝州衛 懷慶衛 潁川衛 南陽中護衛 已下添設 汝州衛 懷慶衛 潁川衛 南陽中護衛

名釣州後改 嵩縣千戶所 潁上千戶所 衛輝前千戶所 林縣千戶所 名釣州後改 嵩縣千戶所 潁上千戶所 衛輝前千戶所 林縣

千戶所 鄧州前千戶所 伊府儀衛司 趙府儀衛司 千戶所 鄧州前千戶所 伊府儀衛司 趙府儀衛司

衛司 唐府儀衛司 崇府儀衛司 徽府儀衛司 趙府儀衛司 衛司 唐府儀衛司 崇府儀衛司 徽府儀衛司 趙府儀衛司

鄭府儀衛司 崇府儀衛司 徽府儀衛司 趙府儀衛司 鄭府儀衛司 崇府儀衛司 徽府儀衛司 趙府儀衛司

牧所 鄭府羣牧所 崇府羣牧所 徽府羣牧所 趙府羣牧所 牧所 鄭府羣牧所 崇府羣牧所 徽府羣牧所 趙府羣牧所

前軍都督府在京 留守前衛 龍驤衛 豹韜衛 在外 前軍都督府在京 留守前衛 龍驤衛 豹韜衛 在外

直隸 九江 湖廣都司 舊有武昌右千戶所革 武昌衛 直隸 九江 湖廣都司 舊有武昌右千戶所革 武昌衛

武昌左衛 黃州衛 永州衛 武昌左衛 黃州衛 永州衛

五

田家洞長官司已上屬永順宣慰司保靖州軍民宣慰使司屬都司五寨長官司

保靖宣慰司施南宣撫司屬施州衛東鄉五路安撫司屬施南宣撫司把搖洞長官司上愛茶峒長

官司下愛茶峒長官司鎮遠蠻夷長官司忠孝安撫司屬施南

蠻夷長官司俱屬東鄉五路安撫司金峒安撫司屬施南

劍南長官司忠路安撫司屬施南西坪蠻夷長官司屬金峒

毛宣撫司屬施州衛龍潭安撫司臘壁峒蠻夷長官司屬金峒

屬散毛東流蠻夷長官司臘壁峒蠻夷長官司屬金峒

屬大旺忠建宣撫司屬施州衛忠峒安撫司屬金峒

羅安撫司屬忠建木冊長官司屬高羅鎮南長官司

司唐崖長官司容美宣撫司俱屬施州衛椒山

瑪瑙長官司五峰石寶長官司水盡源通塔平長

官司石梁下峒長官司俱屬容美桑植安撫司湖
廣行都司以湖廣都司衛所改設荊州衛襄陽衛荊州左
衛以湖廣都司衛所改設瞿塘衛襄陽衛荊州左
護衛安陸衛鄖陽衛夷陵千戶所德安千戶
所枝江千戶所長寧千戶所遠安千戶所竹

山千戶所 均州千戶所 房縣千戶所 忠州千戶所 興府儀衛司 興

都留守司 承天衛舊安陸衛嘉靖十八年改 顯陵衛舊爲

荆州左衛嘉靖十八年改 德安千戶所 福建都司 衛 福州中

州左衛 福州右衛 興化衛 泉州衛 漳州衛 大

福寧衛 鎮東衛 平海衛 永寧衛 鎮海衛

金千戶所 已下漆設 定海千戶所 梅花千戶所 金門千

萬安千戶所 莆禧千戶所 福全千戶所 浦城千戶所 崇武千

戶所 中左千戶所 銅山千戶所 高浦千戶所 元鍾千戶所 建寧右衛

六鰲千戶所 南詔千戶所 福建行都司 建寧左衛 邵武衛

戶所 龍巖千戶所 汀州衛 將樂千戶所 武平千戶所 已下漆設 江西

都司 南昌衛正德十六年以左前二衛并改 袁州衛

安福千戶所 建昌千戶所 會昌千戶所 撫州千戶所 永新千戶所 鉛山千戶所 南安

廣信千戶所 儀衛司 益府儀衛司 信豐千戶所 淮府羣牧所 寧府儀衛司 益府羣牧所 淮府

廣東都司 廣州前衛 廣州後衛 廣州左衛 廣州右衛 南海衛 潮州衛 雷州衛 海南衛

衛 碣石衛 清遠衛 神電衛 惠州衛 肇慶衛 廣海衛 已下添設

所 韶州千戶所 德慶千戶所 南雄千戶所 新興千戶所 龍川千戶所 陽江千戶所 程

州 高州千戶所 崖州千戶所 儋州千戶所 增城千戶所 新寧千戶所 東莞千戶所 萬

所 已下添設 大鵬千戶所 長樂千戶所 香山千戶所 平海千戶所 連州千

戶 豐源千戶所 捷勝千戶所 靖海千戶所 甲子門千戶所 蓬州千戶所 大城

澄海千戶所 廣寧千戶所 雙魚千戶所 四會千戶所 寧川千戶所 陽春

信宜千戶所 石城千戶所 永安千戶所 欽州

海安千戶所 靈山千戶所 錦囊千戶所 瀧水千戶所 清瀾千戶所 樂民千戶所 昌化

封門千戶所 函口
千戶所 富霖千戶所

後軍都督府在京 留守後衛 鷹揚衛 典武衛俱南

衛 大寧前衛 會州衛俱北 平行都司 舊衛 富峪

衛 已下添設并北 平山西等衛 改調 寬河衛 舊大寧

後衛 神武左衛 神武後衛 改昭陵衛 忠義左衛

忠義右衛 忠義前衛 忠義後衛 義勇中衛

義勇左衛 義勇右衛 義勇前衛 在外直隸 舊爲

義勇後衛 武成中衛 蔚州左衛

都司有北平三護衛 後俱爲親軍 其不係北平舊衛者

俱永樂以後添設 薊州衛 真定衛 永平衛 山

海衛 遵化衛 已上北平舊衛 密雲中衛 密雲後

衛 以舊密雲分 開平中屯衛 興州左屯衛 興州

右屯衛 興州中屯衛 興州前屯衛 興州後屯衛

延慶衛 舊爲北平都司 居庸關千戶所 後改隆慶衛

後又改此 東勝左衛 東勝右衛 鎮朔衛 涿鹿

衛 舊爲河南寧國衛 屬中府 定邊衛 神武右衛

神武中衛 忠義中衛 盧龍衛 武清衛 撫寧衛

德州衛 寧山衛 舊屬河南都司 屬中府 大同中

屯衛永樂初改調	瀋陽中屯衛	定州衛	已上舊爲
北平山東山西河南等處衛所永樂初調改	天津衛	天津衛	天津衛
已下添設	天津左衛	天津右衛	舊青州左護衛
通州左衛	通州右衛	涿鹿左衛	涿鹿中衛
間衛	潼關衛	舊屬河南都司	德州左衛
戶所	滄州千戶所	已下添設	倒馬關千戶所
河千戶所	白洋口千戶所	順德千戶所	渤海千戶所
舊樂安千戶所	改屬	平定千戶所	大寧都司
蒲州千戶所	俱屬山西都司	後改	保定左
定右衛	保定中衛	保定前衛	保定後衛
元年設	營州左屯衛	營州右屯衛	營州中屯衛
營州前屯衛	營州後屯衛	俱洪武舊	萬全都司
衛永樂改屬	茂山衛	紫荆關千戶所	萬全都司
五年分直隸及山西等處衛所添改	萬全左衛	萬全右衛	懷安
全右衛	宣府前衛	宣府左衛	宣府右衛
衛	開平衛	延慶左衛	舊屬北平行都司
慶右衛	舊屬北平都司	後改	龍門衛
前府後改	保安右衛	舊屬前府	後改
寧衛	懷來衛	保安右衛	舊屬前府
懷來衛	興和千戶所	美峪千戶所	蔚州衛
廣昌			

千戶所舊屬山西都司後改四海冶千戶所山西都

司舊有太原三護衛後革蒲州千戶所改屬直隸廣昌

太原前衛振武衛平陽衛太原左衛太原右衛

化千戶所雁門千戶所保德州千戶所已下添設

儀衛司老營堡千戶所嘉靖十七年添設晉府

代府羣牧所山西行都司舊有蔚州衛後改屬萬全

大同等處衛所調改及添設朔州衛已下俱山西

陽和衛玉林衛高山衛雲川衛天城衛

威遠衛平虜衛山陰千戶所馬邑千戶所井

南京衛所親軍衛金吾前衛金吾後衛羽林左衛

府軍左衛 府軍右衛 府軍前衛 府軍後衛
虎賁左衛 錦衣衛 旗手衛 金吾左衛 金吾右

衛 江淮衛 儀牲千戶所
孝陵衛

五軍都督府屬左軍都督府 本府所屬衛仍隸北京左

水軍左衛 驍騎右衛 龍虎衛 龍虎左衛 舊爲
成都右護衛宣德六年改 英武衛 瀋陽左衛 瀋

陽右衛 右軍都督府 本府所屬衛仍隸北京右府
龍江右衛 虎賁右衛 留守右衛 水軍

右衛 武德 中軍都督府 本府所屬衛仍隸北京中府
廣武衛 留守中衛 神策衛 廣

洋衛 應天衛 和前軍都督府 本府所屬衛仍隸北
陽衛 牧馬千戶所 京前府 留守前衛

衛 龍江左衛 龍驤衛 飛熊衛 天策衛 豹韜 後
衛 豹韜左衛 舊爲成都中護衛宣德六年改調

軍都督府 本府所屬衛仍隸北京後府 留守後衛
橫海衛 鷹揚衛 興武衛 江陰衛

羈縻衛所洪武永樂間邊外歸附者官其長爲都督都

指揮指揮千百戶鎮撫等官賜以敕書印記設都司衛

所

都司一 奴兒干都司

衛三百八十四

朵顏衛 泰寧衛 建州衛 必里衛
舊會典作兀里 福餘衛已上洪武間

置 兀者衛 兀者左衛 兀者右衛 兀者後衛
赤不罕衛 屯河衛 安河衛 已上永樂二年置 毛

隣衛 虎兒文衛 撒力衛 已上永樂三年置 堅河衛

舊會典有溫河 撒力衛 已上永樂三年置 古賁河

衛 右城衛 塔魯木衛 蘇溫河衛 幹灘河衛 舊

會典有灘納河 兀者前衛 卜顏衛 亦罕河衛

納隣河衛 麥蘭河衛 兀列河衛 雙城衛 撮刺

兒衛 亦馬刺衛 幹蘭衛 亦兒古里衛 脫木河

衛 卜刺罕衛 密陳衛 脫倫衛 嘉河衛 塔山

衛 阿速江衛 速平江衛 木魯罕山衛 馬英山

衛 土魯罕山衛 木塔里山衛 朵林山衛 兀也

吾衛 吉河衛 剗竹哈衛 舊會典有撒竹藍 福山

衛舊會典作福三	肥河衛	哈溫河衛舊會典作哈	里河	木束河衛	撒兒忽衛	罕答河衛舊會典作	忽答河	劉童衛已上永樂四年置	阿古河衛	喜	樂溫河衛	木陽河衛	哈蘭城衛	可令河衛	兀	的河衛	哥吉河衛	野木河衛	納刺吉河衛	亦	里察河衛	野兒定河衛	卜魯丹河衛	好屯河衛	亦	喜刺烏河衛舊會典作喜速烏	考郎兀衛	亦速	里河衛	阿刺山衛	隨滿河衛	撒秃河衛	忽蘭	山衛	古魯渾山衛	阿資河衛	甫里河衛	答刺	河衛舊會典作納刺河	撒只刺河衛	甫里河衛	阿里河衛舊	會典作阿吉河	衣木河衛	亦文山衛	木蘭河衛	朵兒必河衛	甫門河衛已上永樂五年置	納木	河衛	童寬山衛	兀魯罕河衛	塔罕山衛	者帖	列山衛	木興衛	友帖衛	牙魯衛	益實衛	弗朵秃	魯衛	乞忽衛	兀里溪山衛	希灘河衛	弗	河衛	阿者迷河衛	撒察河衛	幹蘭河衛	阿真	河衛	木忽阿河衛	欽真河衛	克默河衛	察刺	秃山衛	嘔罕河衛	阮里河衛	列門河衛	秃都	河衛	實山衛	忽里急山衛	莫溫河衛	薛列河	衛已上永樂六年置	卜魯兀衛	葛林衛	把城衛
---------	-----	-----------	----	------	------	----------	-----	------------	------	---	------	------	------	------	---	-----	------	------	-------	---	------	-------	-------	------	---	--------------	------	----	-----	------	------	------	----	----	-------	------	------	----	-----------	-------	------	-------	--------	------	------	------	-------	-------------	----	----	------	-------	------	----	-----	-----	-----	-----	-----	-----	----	-----	-------	------	---	----	-------	------	------	----	----	-------	------	------	----	-----	------	------	------	----	----	-----	-------	------	-----	----------	------	-----	-----

木里吉衛

愛河衛

大里河衛

木刺河衛

舊會典作

法因

山衛葛

州左衛

古魯衛

塔亭衛

弗提衛已上永

哈兒分衛

元城衛

卜魯兀河衛

樂十二年

忽魯愛衛

山衛已上

亦迷河

左衛 阿

討溫衛萑

會典作成已上俱正統間置寄住毛憐衛此下正統	已後續置可木衛失里衛失木魯河衛忽魯	木衛塔馬速衛失烈木衛吉灘衛和屯衛	禾屯吉河衛亦失衛亦力克衛納木衛弗納	河衛忽失木衛兀也衛也速倫衛巴忽魯衛	兀牙山衛塔木衛忽里山衛罕麻衛木里	吉河衛引門河衛木答山衛立山衛只卜得衛塔兒	河衛木忽魯衛木答山衛納刺吉衛兀力衛	忽失河衛脫倫兀衛阿的納河衛兀力衛	阿速衛速溫河衛納刺吉衛撒刺衛亦實衛	弗朶脫河衛亦屯河衛元計溫河衛甫河衛	刺山衛阿者衛童山寬衛替里衛亦里察	河衛哈黑分衛禿河衛好屯衛乞列尼衛弗	撒里河衛忽思木衛兀里河衛忽魯山衛	兒秀河衛沒脫倫衛阿魯必河衛咬里山衛	亦文衛寫豬洛衛答里山衛古木河衛刺兒	衛兀同河衛出萬山衛者屯衛喜辰衛海	河衛蘭河衛朶州山衛者亦河衛納速吉河	衛把忽兒衛鎮真河衛也速河衛者刺禿衛	也魯河衛亦里河衛夫里兀衛幹朶里衛
----------------------	-------------------	------------------	-------------------	-------------------	------------------	----------------------	-------------------	------------------	-------------------	-------------------	------------------	-------------------	------------------	-------------------	-------------------	------------------	-------------------	-------------------	------------------

衛式木衛	山衛	衛	兀勒	添設	赤	失	東	郎	竹	兀	衛	河	萬	河	散	禿
巴里衛	忽禿衛	塔麻所衛	阿城衛	不登衛	列罕山衛	列河衛	河衛	衛	墩衛	山衛	沒倫衛	兀刺河衛	兀衛	弗禿都河衛	密刺禿山衛	者林山衛
樹哈衛	阿乞衛	撒里衛	阿失衛	也速脫衛	老河衛	兒玉衛	朵兒玉衛	黑里河衛	哈郎衛	失郎山衛	魯衛	愛河衛	兀失衛	者列帖衛	甫門衛	波羅河衛
肥哈答衛	台郎衛	你實衛	吉真納河衛	阿木河衛	竹里河衛	兀魯河衛	兀魯河衛	右城衛	歲班衛	亦屯衛	哈阿哈衛	治刺察衛	忽里河衛	察札禿河衛	細木河衛	朵兒平河衛
蓋千衛	塞克衛	平河衛	亦思察河衛	顏亦衛	吉答納河衛	弗郎罕河衛	納速河衛	弗河衛	失山衛	木河衛	速江平衛	卜忽禿河	失里綿	出	沒倫	衛
英禿衛	額克衛	拜苦衛	法衛	顏亦衛	吉答納河衛	弗郎罕河衛	納速河衛	弗河衛	失山衛	木河衛	速江平衛	卜忽禿河	失里綿	出	沒倫	衛
勒伏衛	所力	忽里失	失刺衛	薄羅	顏亦衛	吉答納河衛	弗郎罕河衛	納速河衛	弗河衛	失山衛	木河衛	速江平衛	卜忽禿河	失里綿	出	沒倫

乞忽衛 阿林衛 哈兒速衛 巴答衛 脫木衛
忽把衛 速哈兒衛 馬失衛 塔賽衛 劉里衛

者哈衛 恨克衛 哈失衛 交枝衛 葛衛 艾
答衛 亦蠻衛 哈察衛 革出衛 卜答衛 蜀河

衛 禿里赤山衛
賽因衛 忙哈衛

所二十四 兀者托溫千戶所 哈魯門山千戶所 兀
者揆也木千戶所 兀的罕千戶所 兀者

穩免赤千戶所 兀者已河千戶所 真河千戶所 兀的
年千戶所 兀者已河千戶所 真河千戶所 兀的

千戶所 屯河千戶所 哈三千戶所 兀者屯河千
戶所 古賁河千戶所 五音千戶所 鎖郎塔真河

千戶所 兀者揆野人千戶所 敷答河千戶所 兀
禿河千戶所 兀者可里踢千戶所 哈魯門千戶所 兀

討溫河千戶所 兀站七別兒真站 黑龍江地方莽
者撒野人千戶所 兀站七別兒真站 黑龍江地方莽

河衛忽把希站 忽把希站 地面七 弗孫河地面 木
弗答林站 古代替站 地面七 溫河地面 埔坎

河地面 撒哈地面 亦馬河咬東 寨一 黑龍江忽
地面 可木地面 黑龍江地面 寨一里平寨

西北諸部在明初服屬授以指揮等官設衛給誥印

衛六

赤斤蒙古衛

罕東衛

安定衛

阿端衛

曲先衛

哈密衛

西番卽古土番洪武初遣人招諭又令各族舉舊有官職者至京授以國師及都指揮宣慰使元帥招討等官俾因俗以治自是番僧有封灌頂國師及贊善闡化等王大乘大寶法王者俱給印誥傳以爲信所設有都指揮使司指揮司

都指揮使司二

烏思藏都指揮使司

指揮使司一

隴答

揮使

宣慰使司三

朵甘衛都指揮使司

董卜韓胡宣慰使司

招討司六

朵甘思招討司

長河西魚通

寧遠宣慰使司

朵甘

招

討司 磨兒 萬戶府四 沙兒可萬戶府 乃竹萬戶府
勸招討司 羅思端萬戶府 別思麻萬

府千戶所十七 朵甘思千戶所 長河西千戶所 刺宗千戶所 多八三

所 倫 加八千戶所 果由千戶所 北日千戶所 納竹千戶

戶所 李里加思千戶所 撒里土兒千戶所 哈忽的千

郎千戶所 刺錯牙千戶所 泄里壩千戶所 潤則

魯孫千

班軍者衛所之軍番上京師總為三大營者也初永樂

十三年詔邊將及河南山東山西陝西各都司中都留

守司江南北諸衛官簡所部卒赴北京以俟臨閱京操

自此始仁宗初因英國公張輔等言調直隸及近京軍

番上操備諭以畢農而來先農務遣歸既而輔言邊軍

比悉放還京軍少請調山東河南中都淮揚諸衛校閱制曰可又敕河南山東山西大寧及中都將領凡軍還取衣裝者以三月畢務七月至京老弱者選代官給之馬歲春秋番上共十六萬人大寧七萬七百餘中都山東遞殺河南最少僅一萬四千有奇定爲例後允成國公朱勇等請罷鞏昌諸衛及階文千戶所班軍代以陝西內地卒山東衛士沿海備倭沿海衛士復內調通州衛士漕淮安粟安慶衛士赴京操不便皆更之已并放還陝西班軍正統中京操軍皆戍邊乃遣御史於江北山東北直選卒爲京師備景泰初邊事棘班軍悉留京

間歲乃放還取衣裝于是于謙石亨議三分之留兩番操備保定河間天津放五十日河南山東九十日淮揚中都百日紫荆倒馬白羊三關及保定諸城戍卒屬山東河南者亦如之逃者官鐫秩三等卒盡室謫邊衛明年謙又言班軍分十營團練久不得休請仍分兩番報可成化間河南秋班軍二千餘不至下御史趣之海內燕安外衛卒在京祇供營繕諸役勢家私占復半之卒多畏苦往往愆期乃定違限罪輕者發居庸密雲山海關罰班六月重者發邊衛罰班至年半令雖具然不能革也弘治中兵部言占役之害罰治如議於是選衛兵

八萬團操內外各半外衛四萬兩番迭上李東陽極言
工作困軍班軍逾期不至大率坐此帝然之末年歸大
寧卒兩班萬人正德中宣府軍及京營互調春秋番換
如班軍例迄世宗立乃已嘉靖初尚書李承勛言永樂
中調軍番上京師後遂踵爲故事衛伍半空而在京者
徒供營造不若省行糧之費以募工作御史鮑象賢請
分班軍爲三二入營操一以赴役通政司陳經復請半
放之收其糧募工皆不行久之從朔國公郭勛言寬河
南因災不至班軍而諭後犯者罪必如法兵部因條議
軍士失期治將領之罪以多寡爲差重者至鐫秩戍邊

明史紀事本末卷之六
三
報可其後邊警棘乃併番上軍爲一班五月赴京十一月放還每歲秋防見兵十五六萬仇鸞用事抽邊卒入衛凡選士六萬八千餘又免大寧等衛軍京操改防薊鎮班軍遂耗減豐城侯李熙覈其數僅四萬人因請改徵銀召募而以見軍四萬歸營操練嚴嵩議以各衛兵雖有折乾之弊然清覈令下猶凜凜畏罪若奉旨徵銀恐借爲口實祖宗良法深意一旦蕩然帝是之折乾者衛卒納銀將弁以免其行有事則召募以應亡何從平江伯陳圭奏仍令中都山東河南軍分春秋兩班別爲一營春以三月至八月還秋以九月至來歲二月還工

作毋擅役隆慶初大發卒治河軍人憚久役逃亡多部
議於見役軍中簡銳者著伍而以老弱供畚鍤萬曆二
年科臣言班軍非爲工作設下兵部止議以小工不得
概派而已時積弊已久軍士苦役甚多愆期不至故事
失班脫逃者罰工銀追月糈其後額外多徵軍益逃中
都尤甚自嘉靖四十三年後積逋工銀至五十餘萬兩
巡撫都御史張翀乞蠲額外工價軍三犯者不必罰工
竟調邊衛而巡視京營給事中王道成則言凡軍一班
不到卽係一年脫伍盡扣月糧本軍仍如例解京罰補
正班三年脫班仍調邊衛竝報可衛軍益大困後二十

九年帝以班軍多老弱雇倩令嚴飭之職方主事沈朝
煥給班軍餉皆傭諸丐因言班軍本處有大糧到京有
行糧又有鹽斤銀所費十餘萬金今皆虛冒請解大糧
貯庫有警可召募有工可雇役部議請先申飭俟大工
竣行之是時專以班軍爲役夫番上之初意盡失矣又
五年內庭有小營繕中官陳永壽請仍用班軍可節省
給事中宋一韓爭之謂班軍輪操卽三大營軍所係甚
重今邊鄙多事萬一關吏不謹而京師團練之軍多召
募游徼之役多役占皇城宿衛多白徒四衛扈從多廝
役卽得三都司健卒三萬猶不能無恐况動以興作股

削名存實亡緩急何賴哉不聽四十年給事中麻僖請恤班操之苦後六年順天巡撫都御史劉曰梧言班軍無濟實用因陳募兵十利是時法益弛軍不營操皆居京師爲商販工藝以錢入班將啟禎時邊事洶洶乃移班軍於邊築垣負米無休期而糗糧缺軍多死班將往往逮革特敕兵部右侍郎專督理鑄印給之然已無及

明史卷九十終

明史卷九十一

志第六十七

總裁官總理事務經筵講官保兼太子太保和殿大學士兼管吏部戶部尚書事加六級張廷玉等奉

敕修

兵三

邊防

海防

江防

民壯土兵

鄉兵

元人北歸屢謀興復永樂遷都北平三面近塞正統以後敵患日多故終明之世邊防甚重東起鴨綠西抵嘉峪綿亘萬里分地守禦初設遼東宣府大同延綏四鎮繼設寧夏甘肅薊州三鎮而太原總兵治偏頭三邊制

府駐固原亦稱二鎮是爲九邊初洪武二年命大將軍徐達等備山西北平邊諭令各上方畧從淮安侯華雲龍言自永平薊州密雲迤西二千餘里關隘百二十有九皆置戍守於紫荆關及蘆花嶺設千戶所守禦又詔山西都衛於雁門關太和嶺并武朔諸山谷間凡七十三隘俱設戍兵九年敕燕山前後等十一衛分兵守古北口居庸關喜峰口松亭關烽堠百九十六處叅用南北軍士十五年又於北平都司所轄關隘二百以各衛卒守戍詔諸王近塞者每歲秋勒兵巡邊十七年命徐達籍上北平將校士卒復命將覈遼東定遼等九衛官

軍是後每遣諸公侯校沿邊士馬以籍上二十年置北
平行都司於大寧其地在喜峰口外故遼西郡遼之中
京大定府也西大同東遼陽南北平馮勝之破納哈出
還師城之因置都司及營州五屯衛而封皇子權爲寧
王調各衛兵往守先是李文忠等取元上都設開平衛
及興和等千戶所東西各四驛東接大寧西接獨石二
十五年又築東勝城於河州東受降城之東設十六衛
與大同相望自遼以西數千里聲勢聯絡建文元年文
帝起兵襲陷大寧以寧王權及諸軍歸及卽位封寧王
於江西而改北平行都司爲大寧都司徒之保定調營

州五屯衛於順義薊州平谷香河三河以大寧地畀兀
良哈自是遼東與宣大聲援阻絕又以東勝孤遠難守
調左衛於永平右衛於遵化而墟其地先是興和亦廢
開平徙於獨石宣府遂稱重鎮然帝於邊備甚謹自宣
府迤西迄山西緣邊皆峻垣深濠烽堠相接隘口通車
騎者百戶守之通樵牧者甲士十人守之武安侯鄭亨
充總兵官其敕書云各處烟墩務增築高厚上貯五月
糧及柴薪藥弩墩傍開井井外圍牆與墩平外望如一
重門禦暴之意常凜凜也洪熙改元朔州軍士白榮請
還東勝高山等十衛於故地興州軍士范濟亦言朔州

大同開平宣府大寧皆藩籬要地其土可耕宜遣將率兵修城堡廣屯種皆不能用正統元年給事中朱純請修塞垣總兵官譚廣言自龍門至獨石及黑峪口五百五十餘里工作甚難不若益墩臺瞭守乃增赤城等堡烟墩二十二寧夏總兵官史昭言所轄屯堡俱在河外自河迤東至察罕腦兒抵綏德州沙漠曠遠並無守備請於花馬池築哨馬營大同總兵官方政繼以馬營請欲就半嶺紅寺兒廢營修築宣大巡撫都御史李儀以大同平衍巡哨宜謹請以副總兵主東路叅將主西路而迤北則屬之總兵官都指揮並如議行後三年詔塞

紫荆關諸隘口增守備軍時瓦剌漸強從成國公朱勇請也旣而也先入塞英宗陷於土木景帝卽位十餘年間邊患日多索來毛里孩阿羅出之屬相繼入犯無寧歲成化元年延綏總兵官張傑言延慶等境廣袤千里所轄二十五營堡每處僅一二百人難以應敵宜選精銳九千爲六哨分屯府谷神木二縣龍州榆林二城高家安邊二堡庶緩急有備又請分布鄜慶防秋軍二千餘人於沿邊要害從之七年延綏巡撫都御史余子俊大築邊城先是東勝設衛守在河外榆林治綏德後東勝內遷失險捐米脂魚河地幾三百里正統間鎮守都

督王禎始築榆林城建緣邊營堡二十四歲調延安綏德慶陽三衛軍分戍天順中阿羅出入河套駐牧每引諸部內犯至是子俊乃徙治榆林由黃甫川西至定邊營千二百餘里墩堡相望橫截套口內復塹山堙谷曰夾道東抵偏頭西終寧固風土勁悍將勇士力北人呼爲橐駝城十二年兵部侍郎滕昭英國公張懋條上邊備言居庸關黃花鎮喜峰口古北口燕河營有團營馬步軍萬五千人戍守請益軍五千分駐永平密雲以策應遼東京州鎮番莊浪賀蘭山迤西從雪山過河南通靖虜直至臨鞏俱敵入犯之路請調陝西官軍益以甘

涼臨鞏秦平河洮兵戍安定會寧遇警截擊以涼州銳士五千扼要屯駐彼此策應詔可二十一年敕各邊軍士每歲九月至明年三月俱常操練仍以操過軍馬及風雪免日奏報邊備頗修飭弘治十四年設固原鎮先是固原爲內地所備惟靖虜及火篩入據河套遂爲敵衝乃改平涼之開成縣爲固原州隸以四衛設總制府總陝西三邊軍務是時陝邊惟甘肅稍安而哈密屢爲土魯番所擾乃敕修嘉峪關正德元年春總制三邊都御史楊一清請復守東勝因河爲固東接大同西屬寧夏使河套千里沃壤歸我耕牧則陝右猶可息肩因上

修築定邊營等六事帝可其奏旋以忤中官劉瑾罷所
築塞垣僅四十餘里而已武宗好武邊將江彬等得幸
遼東宣府大同延綏四鎮軍多內調又以京軍六千與
宣府軍六千春秋番換十三年頒定宣大延綏三鎮應
援節度敵不渡河則延綏聽調於宣大渡河則宣大聽
調於延綏從兵部尚書王瓊議也初大寧之棄以其地
畀朵顏福餘泰寧三衛蓋兀良哈歸附者也未幾遂不
靖宣宗嘗因田獵親率師敗之自是畏服故喜峰密雲
止設都指揮鎮守土木之變頗傳三衛助逆後因添設
太監叅將等官至是朵顏獨盛情叵測嘉靖初御史邱

養浩請復小河等關於外地以扼其要又請多鑄火器給沿邊州縣募商糴粟實各邊衛所詔皆行之初太祖時以邊軍屯田不足召商輸邊粟而與之鹽富商大賈悉自出財力募民墾田塞下故邊儲不匱弘治時戶部尚書葉淇始變法令商納銀太倉分給各邊商皆撤業歸邊地荒蕪米粟踊貴邊軍遂日困十一年御史徐汝圭條上邊防兵食謂延綏宜漕石州保德之粟自黃河而上楚粟由鄖陽汴粟由陝洛沔粟由漢中以達陝右宣大產二麥宜多方收糴紫荆倒馬白羊等關宜招商賃車運又請以宣府遊兵駐右衛懷來以援大同選補

遊兵於順聖西城爲臨期應援永寧等處游兵衛宣府
備調遣直隸八府召募勇敢團練赴邊關遠近警急榆
林山陝游兵於本處策應報可亦未能行也十八年移
三邊制府鎮花馬池是時俺答諸部強橫屢深入大同
太原之境晉陽南北烟火蕭然巡撫都御史陳講請以
兵六千戍老營堡東界之長峪以山西兵守大同三關
形勢寧武爲中路莫要於神池偏頭爲西路莫要於老
營堡皆宜改設叅將雁門爲東路莫要於北樓諸口宜
增設把總指揮而移神池守備於利民堡老營堡游擊
於八角所各增軍設備帝悉許之規畫雖密然兵將率

怯弱其健者僅能自守而已二十二年詔宣府兵乘塞舊制總兵夏秋間分駐邊堡謂之暗伏至是有司建議入秋悉令赴邊分地拒守至九月中罷歸犒以帑金久之以勞費罷二十四年巡按山西御史陳豪言敵三犯山西傷殘百萬費餉銀六十億曾無尺寸功請定計決戰盡復套地明年敵犯延安總督三邊侍郎曾銑力主復套條上十八事帝嘉獎之大學士嚴嵩窺帝意憚兵且欲殺舊閣臣夏言因劾銑并言誅死自是無敢言邊事者二十九年俺答攻古北口從間道黃榆溝入直薄東直門諸將不敢戰敵退大將軍仇鸞力主貢市之議

明年開馬市於大同然寇掠如故又明年馬市罷先是
翁萬達之總督宣大也籌邊事甚悉其言曰山西保德
州河岸東盡老營堡凡二百五十四里西路丫角山迤
北而東歷中北路抵東路之東陽河鎮口臺凡六百四
十七里宣府西路西陽河迤東歷中北路抵東路之永
寧四海冶凡一千二十三里皆逼臨巨寇險在外者所
謂極邊也老營堡轉南而東歷寧武雁門北樓至平刑
關盡境約八百里又轉南而東爲保定界歷龍泉倒馬
紫荆吳王口插箭嶺浮圖峪至沿河口約一千七十餘
里又東北爲順天界歷高崖白羊抵居庸關約一百八

十餘里皆峻嶺層岡險在內者所謂次邊也敵犯山西必自大同入紫荆必自宣府未有不經外邊能入內邊者乃請修築宣大邊牆千餘里烽堠三百六十三所後以通市故不復防遂半爲敵毀至是兵部請敕邊將修補科臣又言垣上宜築高臺建廬以栖火器從之時俺答益强朵顏三衛爲之嚮道遼薊宣大連歲被兵三十四年總督軍務兵部尚書楊博旣解大同右衛圍因築牛心諸堡修烽堠二千八百有奇宣大間稍寧息而薊鎮之患不已薊之稱鎮自二十七年始時鎮兵未練因詔各邊入衛兵往戍旣而兵部言大同之三邊陝西之

固原宣府之長安嶺延綏之夾牆皆據重險惟薊獨無
渤海所南山陵東有蘇家口至寨籬村七十里地形平
漫宜築牆建臺設兵守與京軍相夾制報可時兵力孱
弱有警徵召四集而議者惟以據險爲事無敢言戰者
其後薊鎮入衛兵俱聽宣大督撫調遣防禦益疎朶顏
遂乘虛歲入三十七年諸鎮建議各練本鎮戍卒可省
徵發費十之六然戍卒選悞不任戰歲練亦費萬餘而
臨事徵發如故隆慶間總兵官戚繼光總理薊遼任練
兵事因請調浙兵三千人以倡勇敢及至待命於郊自
朝至日中天雨軍士跬步不移邊將大駭自是薊兵以

精整稱俺答已通貢封順義王其子孫襲封者累世迨萬曆之季西部遂不競而土蠻部落虎燉兔炒花宰賽煖免輩東西煽動將士疲於奔命未嘗得安枕也初太祖沿邊設衛惟土著兵及有罪謫戍者遇有警調他衛軍往戍謂之客兵永樂間始命內地軍番戍謂之邊班其後占役逃亡之數多乃有召募有改撥有修守民兵土兵而邊防日益壞洪武時宣府屯守官軍始十萬正統景泰間已不及額弘治正德以後官軍實有者僅六萬六千九百有奇而召募與土兵居其半他鎮率視此正統初山西河南班軍守偏頭大同宣府塞不得代巡

撫于謙言每歲九月至二月水冷草枯敵騎出沒乘障卒宜多若三月至八月邊守自足乞將兩班軍每歲一班如期放遣甘肅總兵官蔣貴又言沿邊墩臺守瞭軍更番有例惟坐事謫發者不許困苦甚乞如例踐更並從之五年山西總兵官李謙請偏頭關守備軍如大同例半歲更番部議每番皆十月而戍卒仍率以歲爲期有久而後遣者弘治中三邊總制秦紘言備禦延綏官軍自十二月赴邊旣周一歲至次年二月始得代在軍日多請歲一更上下俱在三月初邊軍便之嘉靖四十年三年巡撫延綏胡志夔請免戍軍三年每軍徵銀五兩

四錢爲募兵用至萬曆初大同督撫方逢時等請修築費詔以河南應戍班軍自四年至六年概免盡扣班價發給謂之折班班軍遂耗久之所徵亦不得寧山南陽潁上三衛積逋延綏鎮折班銀至五萬餘兩是後諸邊財力俱盡敝劫極矣初邊政嚴明官軍皆有定職總兵官總鎮軍爲正兵副總兵分領三千爲奇兵遊擊分領三千往來防禦爲遊兵叅將分守各路東西策應爲援兵營堡墩臺分極衝次衝爲設軍多寡平時走陣哨探守瞭焚荒諸事無敢惰稍違制輒按軍法而其後皆廢壞云

沿海之地自廣東樂會接安南界五千里抵閩又二千里抵浙又二千里抵南直隸又千八百里抵山東又千二百里踰寶坻盧龍抵遼東又千三百餘里抵鴨綠江島寇倭夷在在出沒故海防亦重吳元年用浙江行省平章李文忠言嘉興海鹽海寧皆設兵戍守洪武四年十二月命靖海侯吳禎籍方國珍所部溫台慶元三府軍士及蘭秀山無田糧之民凡十一萬餘人隸各衛爲軍且禁沿海民私出海時國珍及張士誠餘衆多竄島嶼間勾倭爲寇五年命浙江福建造海舟防倭明年從德慶侯廖永忠言命廣洋江陰橫海水軍四衛增置多

櫓快船無事則巡徼遇寇以火船薄戰快船逐之詔禎
充總兵官領四衛兵京衛及沿海諸衛軍悉聽節制每
春以舟師出海分路防倭迄秋乃還十七年命信國公
湯和巡視海上築山東江南北浙東西沿海諸城後三
年命江夏侯周德興抽福建福興漳泉四府三丁之一
爲沿海戍兵得萬五千人移置衛所於要害處築城十
六復置定海盤石金鄉海門四衛於浙金山衛於松江
之小官場及青村南漚嘴城二千戶所又置臨山衛於
紹興及三山瀝海等千戶所而寧波溫台並海地先已
置八千戶所曰平陽三江龍山鄞衢大松錢倉新河松

門皆屯兵設守二十一年又命和行視閩粵築城增兵
置福建沿海指揮使司五曰福寧鎮東平海永寧鎮海
領千戶所十二曰大金定海梅花萬安莆禧崇武福全
金門高浦六鰲銅山元鍾二十三年從衛卒陳仁言造
蘇州太倉衛海舟旋令濱海衛所每百戶及巡檢司皆
置船二巡海上盜賊後從山東都司周彥言建五總寨
於寧海衛與萊州衛八總寨共轄小寨四十八已復命
重臣勲戚魏國公徐輝祖等分巡沿海帝素厭日本詭
譎絕其貢使故終洪武建文世不爲患永樂六年命豐
城侯李彬等緣海捕倭復招島人蜑戶賈豎漁丁爲兵

防備益嚴十七年倭寇遼東總兵官劉江殲之於望海
堦自是倭大懼百餘年間海上無大侵犯朝廷閱數歲
一令大臣巡警而已至嘉靖中倭患漸起始設巡撫浙
江兼管福建海道提督軍務都御史已改巡撫爲巡視
未幾倭寇益肆乃增設金山叅將分守蘇松海防尋改
爲副總兵調募江南北徐邳官兵充戰守而杭嘉湖
亦增叅將及兵備道二十三年調撥山東民兵及青州
水陸槍手千人赴淮揚聽總督南直軍務都御史張經
調用時倭縱掠杭嘉蘇松踞柘林城爲窟穴大江南北
皆被擾監司任環敗之經亦有王家涇之捷乃遁出海

復犯蘇州於是南京御史屠仲律言五事其守海口云
守平陽港黃花澳據海門之險使不得犯溫台守寧海
關湖頭灣遏三江之口使不得窺寧紹守鯨子門乍浦
峽使不得近杭嘉守吳淞劉家河七了港使不得掩蘇
松且宜修飭海舟大小相比或百或五十聯爲一鯨募
慣習水工領之而充以原額水軍於諸海口量緩急置
防部是其議未幾兵部亦言浙直通泰間最利水戰往
時多用沙船破賊請厚賞招徠之防禦之法守海島爲
上宜以太倉崇明嘉定上海沙船及福倉東莞等船守
普陀大衢陳錢山乃浙直分路之始狼福二山約束首

尾交接江洋亦要害地宜督水師固守報可已復令直隸吳淞江劉家河福山港鎮江圖山五總添設游兵聽金山副總兵調度時胡宗憲爲總督誅海賊徐海汪直直部三千人復勾倭入寇閩廣益騷三十七年都御史王詢請分福建之福興爲一路領以叅將駐福寧水防自流江烽火門俞山小埕至南日山漳泉爲一路領以叅將駐詔安水防自南日山至浯嶼銅山元鍾走馬溪安邊館水陸兵皆聽節制福建省城介在南北去海僅五十里宜更設叅將選募精銳部領哨船與主客兵相應援部覆從之廣東惠潮亦增設叅將駐揭陽福建巡

撫都御史游震得言浙江溫處與福寧接壤倭所出沒
宜進戚繼光爲副總兵守之而增設福寧守備隸繼光
漳州之月港亦增設守備隸總兵官俞大猷延建邵爲
八閩上游宜募兵以備緩急皆允行旣而宗憲被逮罷
總督官以浙江巡撫趙炳然兼任軍事炳然因請令定
海總兵屬浙江金山總兵屬南直俱兼理水陸軍務互
相策應其後莆田倭寇平乃復五水寨舊制五寨者福
寧之烽火門福州之小埕澳興化之南日山泉州之浯
嶼漳州之西門澳亦曰銅山景泰三年鎮守尚書薛希
璉奏建者也後廢至是巡撫譚綸疏言五寨守扼外洋

法甚周悉宜復舊以烽火門南日浯嶼三艚爲正兵銅山小埕二艚爲游兵寨設把總分汛地明斥埃嚴會哨改三路叅將爲守備分新募浙兵爲二班各九千人春秋番上各縣民壯皆補用精悍每府領以武職一人兵備使者以時閱視帝皆是之狼山故設副總兵至是改爲鎮守總兵官兼轄大江南北迨隆慶初倭漸不爲患而諸小寇往往有之萬曆三年設廣東南澳總兵官以其據漳泉要害也久之倭寇朝鮮朝廷大發兵往援先後六年於是設巡撫官於天津防畿甸後十餘年從南直巡按御史顏思忠言分淮安大營兵六百守廖角嘴

從福建巡撫丁繼嗣言設兵自浙入閩之三江及劉澳而易海澄團練營土著軍以浙兵天啟中築城於澎湖設游擊一把總二統兵三千築礮臺以守先是萬曆中許孚遠撫閩奏築福州海壇山因及澎湖諸嶼且言浙東沿海陳錢金塘玉環南麂諸山俱宜經理遂設南麂副總兵而澎湖不暇及其地遙峙海中透迤如修蛇多岐港零嶼其中空濶可藏巨艘初爲紅毛所據至是因巡撫南居益言乃奪而守之自世宗世倭患以來沿海大都會各設總督巡撫兵備副使及總兵官叅將游擊等員而諸所防禦於廣東則分東中西三路設三叅將

於福建則有五水寨於浙則有六總一金鄉盤石二衛
一松門海門二衛一昌國衛及錢倉爵溪等所一定海
衛及霽靄大嵩等所一觀海臨山二衛一海寧衛分統
以四叅將於南直隸則乍浦以東金山衛設叅將黃浦
以北吳淞江口設總兵於淮揚則總兵駐通州游擊駐
廟灣又於揚州設陸兵游擊待調遣於山東則登萊青
三府設巡察海道之副使管理民兵之叅將總督沿海
兵馬備倭之都指揮於薊遼則大沽海口宿重兵領以
副總兵而以密雲永平兩游擊爲應援山海關外則廣
寧中前等五所兵守各汛以寧前叅將爲應援而金復

海蓋諸軍皆任防海三岔以東九聯城外創鎮江城設游擊統兵千七百哨海上北與寬奠叅將陸營相接共計凡七鎮而守備把總分守巡徼會哨者不下數百員以三四五月爲大汛九十月爲小汛蓋遭倭甚毒故設防亦最密云日本地與閩相值而浙之招寶關其貢道在焉故浙閩爲最衝南寇則廣東北寇則由江犯留都淮揚故防海外防江爲重洪武初於都城南新江口置水兵八千已稍置萬二千造舟四百艘又設陸兵於北岸浦子口相犄角所轄沿江諸郡上自九江廣濟黃梅下抵蘇松通泰中包安慶池和太平凡盜賊及販私鹽

者悉令巡捕兼以防倭永樂時特命勛臣爲帥視江操其後兼用都御史成化四年從錦衣衛僉事馮瑤言令江兵依地設防於瓜儀太平置將領鎮守後六年守備定西侯蔣琬奏調建陽鎮江諸衛軍補江兵缺伍十三年命擇武大臣一人職江操毋攝營務又五年從南京都御史白昂言敕沿江守備官互相應援并給關防著爲令弘治中命新江口兩班軍如京營例首班歇卽以次班操嘉靖八年江陰賊侯仲金等作亂給事中夏言請設鎮守江淮總兵官已而寇平總兵罷不設十九年沙賊黃良等復起帝詰兵部以罷總兵之故乃復設給

旗牌符敕提督沿江上下後復裁罷三十二年倭患熾
復設副總兵於金山衛轄沿海至鎮江與狼山副總兵
水陸相應時江北俱被倭於是量調九江安慶官軍守
京口圖山等地久之給事中范宗吳言故事操江都御
史防江應鳳二巡撫防海後因倭警遂以鎮江而下通
常狼福諸處隸之操江以故二撫臣得諉其責操江又
以向非本屬兵難遙制亦漠然視之非委任責成意宜
以圖山三江會口爲操撫分界報可其後增上下兩江
巡視御史得舉劾有司將領而以南京僉都御史兼理
操江不另設先是增募水兵六千隆慶初以都御史吳

時來請留四之一餘悉罷遣并裁中軍把總等官已復令分汛設守而責以上下南北互相策應又從都御史宋儀望言諸軍皆分駐江上不得居城市萬曆二十年以倭警言者請復設京口總兵南京兵部尚書衷貞吉等謂既有吳淞總兵不宜兩設乃設兵備使者每春汛調備倭都督統衛所水陸軍赴鎮江後七年操江耿定力奏長江千餘里上江列營五兵備臣三下江列營五兵備臣二宜委以簡閱訓練卽以精否爲兵備殿最部議以爲然故事南北總哨官五日一會哨於適中地將領官亦月兩至江上會哨其後多不行崇禎中復以勲

臣任操江偷惰成習會哨巡徼皆虛名非有實矣

衛所之外郡縣有民壯邊郡有土兵太祖定江東循元制立管領民兵萬戶府後從山西行都司言聽邊民自備軍械團結防邊閩浙苦倭指揮方謙請籍民丁多者爲軍尋以爲患鄉里詔閩浙互徙時已用民兵然非召募也正統二年始募所在軍餘民壯願自效者陝西得四千二百人人給布二匹月糧四斗景泰初遣使分募直隸山東山西河南民壯撥山西義勇守大同而紫荆倒馬二關亦用民兵防守事平免歸成化二年以邊警復二關民兵敕御史往延安慶陽選精壯編伍得五千

餘人號曰土兵以延綏巡撫盧祥言邊民驍果可練爲兵使護田里妻子故有是命弘治二年立僉民壯法州縣七八百里以上里僉五人五百里四三百里三百里以上二有司訓練遇警調發給以行糧而禁役占放買之弊富民不願則上直於官官自爲募或稱機兵在巡檢司者稱弓兵後以越境防冬非計大同巡撫劉宇請免其班操徵銀糧輸大同而以威遠屯丁舍餘補役給事中熊偉亦請編應募民於附近衛所並從之十四年以西北諸邊所募土兵多不足五千遣使齎銀二十萬及太僕寺馬價銀四萬往募指揮千百戶以募兵多寡

爲差得遷級失官者得復職卽令統所募兵旣而兵部
議覆侍郎李孟暘請實軍伍疏謂天下衛所官軍原額
二百七十餘萬歲久逃故嘗選民壯三十餘萬又覈衛
所舍人餘丁八十八萬西北諸邊召募土兵無慮數萬
請如孟暘奏察有司不操練民壯私役雜差者如役占
軍人罪報可正德中流賊擾山東巡撫張鳳選民兵令
自買馬團操民不勝其擾兵部侍郎楊潭以爲言都御
史甯杲所募多無賴子爲御史張璿所劾嘉靖二十二
年增州縣民壯額大者千人次六七百小者五百二十
九年京師新被寇議募民兵以二萬爲率歲四月終赴

近京防禦後五年兵部尚書楊博請汰老弱存精銳在外者發各道爲民兵在京者隸之巡捕叅將逃者不補帝以影占數多耗糧無用遣官覈宜罷宜還者以聞隆慶中張居正陳以勤復請籍畿甸民兵謂直隸八府人多健悍總按戶籍除單丁老弱者父子三人籍一子兄弟三人籍一弟州與大縣可得千六百人小縣可得千人中分之爲正兵奇兵登名尺籍隸撫臣操練歲無過三月月無過三次練畢卽令歸農復其身歲操外不得別遣命所司議行然自嘉靖後山東河南民兵戍薊門者率徵銀以充召募至萬曆初山東徵銀至五萬六千

兩貧民大困治河之役給事中張貞觀請益募土兵捍
淮揚徐邳畿南盜起給事中耿隨龍請復民壯舊制專
捕賊盜播州之亂工部侍郎趙可懷請練土著兵部因
言天下之無兵者不獨蜀也各省官軍民壯皆宜罷老
穉易以健卒軍操屬印官操官民操屬正官捕官郡守
監司不得牽制立營分伍以憑調發先後皆議行末年
募兵措餉益急南京職方郎中鄒維璉陳調募之害山
西叅政徐九翰尤極言民兵不可調崇禎時中原盜急
兵部尚書楊嗣昌議令責州縣訓練土著爲兵工部侍
郎張慎言言其不便者數事而御史米壽圖又言其害

有十謂不若簡練民兵增民壯快手備禦地方爲便後
嗣昌死練兵亦不行鄉兵者隨其風土所長應募調佐
軍旅緩急其隸軍籍者曰浙兵義烏爲最處次之台寧
又次之善狼筈間以义槩戚繼光製鴛鴦陣以破倭及
守薊門最有名曰川兵曰遼兵崇禎時多調之勦流賊
其不隸軍籍者所在多有河南嵩縣曰毛葫蘆習短兵
長於走山而嵩及盧氏靈寶永寧並多礦兵曰角腦又
曰打手山東有長竿手徐州有箭手井陘有螞螂手善
運石遠可及百步閩漳泉習鏢牌水戰爲最泉州永春
人善技擊正統間郭榮六者破沙尤賊有功商竈鹽丁

以私販爲業多勁果成化初河東鹽徒千百輩自備火礮强弩車仗雜官軍逐寇而松江曹涇鹽徒嘉靖中逐倭至島上焚其舟後倭見民家有鹺囊輒搖手相戒粵東雜蠻蜚習長牌斫刀而新會東莞之產强半延綏固原多邊外土著善騎射英宗命簡練以備秋防大籐峽之役韓雍用之以摧猱獍之用牌刀者莊浪魯家軍舊隸隨駕中洪熙初令土指揮領之萬曆間部臣稱其驍健爲敵所畏宜鼓舞以儲邊用西寧馬戶八百嘗自備騎械赴敵後以欸貢裁之萬曆十九年經畧鄭維請復其故又僧兵有少林伏牛五臺倭亂少林僧應募者四

明史卷九十一
十餘人戰亦多勝西南邊服有各土司兵湖南永順保靖二宣慰所部廣西東蘭那地南丹歸順諸狼兵四川酉陽石砦秦氏冉氏諸司宣力最多末年邊事急有司專以調三省土司爲長策其利害亦恒相半云


明史卷九十一終

明史卷九十二

志第六十八

總督總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修



兵四

清理軍伍

訓練

賞功

火器

車船

馬政

明初梁集令行民出一丁爲軍衛所無缺伍且有美丁未幾大都督府言起吳元年十月至洪武三年十一月軍士逃亡者四萬七千九百餘於是下追捕之令立法

懲戒小旗逃所隸三人降爲軍上至總旗百戶千戶皆
視逃軍多寡奪俸降革其從征在外者罰尤嚴十六年
命五軍府檄外衛所速逮缺伍士卒給事中潘庸等分
行清理之明年從兵部尚書俞綸言京衛軍戶絕者毋
冒取同姓及同姓之親令有司覈實發補府衛毋特遣
人二十一年詔衛所覈實軍伍有匿己子以養子代者
不許其秋令衛所著軍士姓名鄉貫爲籍具載丁口以
便取補又置軍籍勘合分給內外軍士遇點閱以爲驗
成祖卽位遣給事等官分閱天下軍重定槩集軍更代
法初三丁已上槩正軍一別有貼戶正軍死貼戶丁補

至是令正軍貼戶更代貼戶單丁者免當軍家蠲其一
丁徭洪熙元年興州左屯衛軍范濟極言勾軍之擾富
峪衛百戶錢興奏言祖本涿鹿衛軍死父繼以功授百
戶臣已襲父職而本衛猶以臣祖爲逃軍屢行勾取帝
謂尚書張本曰軍伍不清弊多類此已而宣宗立軍弊
益滋黠者往往匿其籍或誣攘良民充伍帝諭兵部曰
朝廷於軍民如舟車任載不可偏重有司宜審實毋混
乃分遣吏部侍郎黃宗載等清理天下軍衛三年敕給
事御史清軍定十一條例榜示天下明年復增爲二十
二條五年從尚書張本請令天下官吏軍旗公勘自洪

永來勾軍之無踪者豁免之六年令勾軍有親老疾獨
子者編之近地餘丁赴工逋亡者例發口外改爲罰工
一年示優恤焉八年免蘇州衛抑配軍百五十九人已
食糧止令終其身者千二百三十九人先是蘇常軍戶
絕者株累族黨動以千計知府况鍾言於朝又常州民
訴受抑爲軍者七百有奇故特敕巡撫侍郎周忱清理
正統初令勾軍家丁盡者除籍逃軍死亡及事故者或
家本軍籍而偶同姓名里胥挾讐妄報冒解或已解而
赴部聲寃者皆與豁免定例補伍皆發極邊而南北人
互易大學士楊士奇謂風土異宜瀕於夭折請從所宜

發戍署兵部侍郎鄺埜以爲素祖制寢之成化二年山西巡撫李侃復請補近衛始議行十一年命御史十一人分道清軍以十分爲率及三分者最不及者殿時以罪謫者逃故亦勾其家丁御史江昂謂非罰弗及嗣之義乃禁之嘉靖初捕亡令愈苛有株累數十家勾攝經數十年者丁口已盡猶移覆紛紜不已兵部尚書胡世寧請屢經清報者免勾又避役之人必緩急難倚急改編原籍衛所有缺伍則另選舍餘及犯罪者充補犯重發邊衛者責賣家產闔房遷發使絕顧念庶衛卒皆土著而逃亡益鮮帝是其言其後用主事王學益議製勾

單立法詳善久之停差清軍御史寬管解逃軍及軍赴衛違限之科清軍官日玩愒文卷磨滅議者復請申飭萬曆三年給事中徐貞明言勾軍東南資裝出於戶了解送出於里遞每軍不下百金大困東南之民究無補於軍政宜視班匠例免其解補而重徵班銀以資召募使東南永無勾補之擾而西北之行伍亦充鄖陽巡撫王世貞因言有四便應勾之戶樂於就近不圖避匿便一各安水土不至困絕便二近則不逃逃亦易追便三解戶不至破家便四而兵部卒格貞明議不行後十三年南京兵部尚書郭應聘復請各就近地南北改編又

言應勾之軍南直隸至六萬六千餘株連至二三十萬人請自天順以前竟與釋免報可遠近皆悅然改編令下求改者相繼明年兵部言什伍漸耗邊鎮軍人且希圖脫伍有旨復舊而應聘之議復不行凡軍衛掌於職方而勾清則武庫主之有所勾攝自衛所開報先覈鄉貫居止內府給批下有司提本軍謂之跟捕捉家丁謂之勾捕間有恩恤開伍者洪武二十三年令應補軍役生員遣歸卒業宣德四年上虞人李志道充楚雄衛軍死有孫宗臯宜繼時已中鄉試尚書張本言於帝得免如此者絕少戶有軍籍必仕至兵部尚書始得除軍士

應起解者皆僉妻有津給軍裝解軍行糧軍丁口糧之費其冊單編造皆有恒式初定戶口收軍勾清三冊嘉靖三十一年又編四冊曰軍貫曰兜底曰類衛類姓其勾軍另給軍單蓋終明世於軍籍最嚴然弊政漸叢而擾民日甚

明太祖起布衣策羣力取天下卽位後屢命元勛宿將分道練兵而其制未定洪武六年命中書省大都督府御史臺六部議教練軍士律騎卒必善馳射槍刀步兵必善弓弩槍步射以十二矢之半遠可到近可中爲程遠可到將弁百六十步軍士百二十步近可中五十步

穀弩以十二矢之五遠可到蹶張八十步划車六十步
槍必進退熟習在京衛所以五千人爲率取其一指揮
以下官領赴御前驗試餘以次番試在外都司衛所每
衛五千人取五之一千戶以下官領赴京驗試餘以次
番試軍士步騎皆善將領各以其能受賞否則軍士給
錢六百爲道里費將領自指揮使以下所統軍士三分
至六分不中者次第奪俸七分以上次第降官至爲軍
止都指揮軍士四分以上不中奪俸一年六分以上罷
職後十六年令天下衛所善射者十選一於農隙分番
赴京較閱以優劣爲千百戶賞罰邊軍本衛較射二十

年命衛士習射於午門丹墀明年復令天下衛所馬步軍士各分十班將弁以廕敘久次陞者統之冬月至京閱試指揮千百戶年深慣戰及屯田者免仍先下操練法俾遵行不如法及不嫻習者罰明年詔五軍府比試軍士分三等賞鈔又各給鈔三錠爲路費不中者亦給之明年再試不如式軍移戍雲南官謫從征總小旗降爲軍武臣子弟襲職試騎步射不中程令還衛署事與半俸二年後仍試如故者亦降爲軍文皇卽位五駕北征六師嘗自較閱又嘗敕秦晉周肅諸王各選護衛軍五千命官督赴真定操練陝西甘肅寧夏大同遼東諸

守將及中都留守河南等都司徐宿等衛遣將統馬步軍分駐真定德州操練候赴京閱視景泰初立十團營給事中鄧林進軒轅圖卽古八陣法也因用以教軍成化間增團營爲十二命月二次會操起仲春十五日止仲夏十五日秋冬亦如之弘治九年兵部尚書馬文升申明洪永操法五日內二日走陣下營三日演武武宗好武勇每令提督坐營官操練又自執金鼓演四鎮卒然大要以恣馳騁供嬉戲非有實也嘉靖六年定下營布陣止用三疊陣及四門方營又令每營選槍刀箭牌銃手各一二人爲教師轉相教習及更營制分兵三十

明史紀事本末卷之六
枝設將三十員各統三千人訓練擇精銳者名選鋒厚其校藝之賞總督大臣一月會操者四餘日營將分練協理大臣及巡視給事御史隨意入一營校閱賞罰因以擇選鋒帝又置內營於內教場練諸內使隆慶初命各營將領以教練軍士分數多寡爲黜陟全營教練者加都督僉事以次減全不教練者降祖職一級革任回衛三年內教練有成操協大臣獎諭恩錄無功績者議罰規制雖立然將卒率媮惰操演徒爲具文先是浙江叅將戚繼光以善教士聞嘗調土兵製鴛鴦陣破倭至是已官總兵穆宗從給事中吳時來請命繼光練兵薊

門薊兵精整者數十年繼光嘗著練兵實紀以訓士一
曰練伍首騎次步次車次輜重先選伍次較藝總之以
合營二曰練膽氣使明作止進退及上下統屬相友相
助之義三曰練耳使明號令四曰練手足使熟技藝五
曰練營陣詳布陣起行結營及交鋒之正變終之以練
將後多遵用之

賞功之制太祖時大賞平定中原征南諸將及雲南越
州之功賞格雖具然不豫爲令惟二十九年命沿海衛
所指揮千百戶獲倭一船及賊者陞一級賞銀五十兩
鈔五十錠軍士水陸禽殺賊賞銀有差永樂初以將士

久勞命禮部依太祖陞賞例參酌行之乃分奇功首功
次功三等其賞之輕重次第率臨時取旨亦不豫爲令
十二年定凡交鋒之際突出敵背殺敗賊衆者勇敢入
陣斬將擐旗者本隊已勝別隊勝負未決而能救援克
敵者受命能任事出奇破賊成功者皆爲奇功齊力前
進首先敗賊者前隊交鋒未決後隊向前敗賊者皆爲
首功軍行及營中禽獲奸細者亦准首功餘皆次功又
立功賞勘合定四十字曰神威精勇猛強壯毅英雄克
勝兼超捷奇功奮銳鋒智謀宣妙略剛烈効忠誠果敢
能安定揚名顯大勲編號用寶貯內府印綬監當是時

稽功之法甚嚴正統十四年造賞功牌有奇功頭功齊力之分以大臣主之凡挺身突陣斬將奪旗者與奇功牌生禽瓦刺或斬首一級與頭功牌雖無功而被傷者與齊力牌蓋專爲瓦刺入犯設也是後將士功賞視立功之地準例奏行北邊爲上東北邊次之西番及苗蠻又次之內地反賊又次之世宗時苦倭甚故海上功比北邊尤爲最北邊自甘肅迤東抵山海關成化十四年例一人斬一級者進一秩至三秩止二人共斬者爲首進秩同壯男與實授幼弱婦女與署職爲從及四級以上俱給賞領軍官部下五百人者獲五級進一秩領千

人者倍之正德十年重定例獨斬一級者陞一秩三人共者首陞署一秩從給賞四五六人共者首給賞從量賞二人共斬一幼敵者首視三人例從量賞不願陞者每實授一秩賞銀五十兩署職二十兩嘉靖十五年定領軍官千把總加至三秩止都指揮以上止陞署職二級餘加賞東北邊初定三級當北邊之一萬曆中改與北邊同番寇苗蠻亦三級進一秩實授署職視北邊十級以上并不及數者給賞萬曆三年令陝西番寇功視成化中例軍官千總領五百人者部下斬三十級領千人者六十級把總領五百人者十級領千人者三十級

俱進一秩至三秩止南方蠻賊宣德九年例三級以上及斬獲首賊俱陞一秩餘加賞正德十六年定軍官部下斬百級者陞署一秩三百級者實授一秩四百級者陞一秩餘功加賞倭賊嘉靖三十五年定斬倭首賊一級陞實授三秩不願者賞銀百五十兩從賊一級授一秩漢人脇從一級署一秩陣亡者本軍及子實授一秩海洋遇賊有功均以奇功論萬曆十二年更定視舊例少變以賊衆及船之多寡爲功賞之差復定海洋征戰無論倭寇海賊勘是奇功與世襲雲南夷賊禽斬功次視倭功內地反賊成化十四年例六級陞一秩至三秩

止幼男婦女及十九級以上與不及數者給賞正德七年定流賊例名賊一級授一秩世襲爲從者給賞次賊一級署一秩從賊三級及陣亡者俱授一秩世襲重傷回營死者署一秩又以割耳多寡論功最多者至陞二秩世襲先是五年寧夏功後嘉靖元年江西功俱視流賊例崇禎中購闖獻以萬金爵封侯餘賊有差以賊勢重變常格也其俘獲人畜器械成化例俱給所獲者其論功陞秩成化十四年例軍士陞一秩爲小旗舍人陞一秩給冠帶以上類推嘉靖四十三年定都督等官無階可陞者所應襲男廕冠帶萬曆十三年定都指揮使

陞秩者不授都督賞銀五十兩陞俸者半之其有司民兵隆慶六年定視軍人例自洪宣以後賞格皆以斬級多少豫定條例漸多倖弊日啓正德間副使胡世寧言兩軍格鬪手眼瞬息不得差池何暇割級其獲級者或殺已降或殺良民或偶得單行之賊被掠逃出之人非真功也宜選強明剛正之員爲紀功官痛懲此弊時弗能行故事鎮守官奏帶例止五名後領兵官所奏有至三四百名者不在斬馘之例別立名目曰運送神鎗曰齎執旗牌曰衝鋒破敵曰三次當先曰軍前効勞冒濫之弊至斯極已

古所謂礮皆以機發石元初得西域礮攻金蔡州城始用火然造法不傳後亦罕用至明成祖平交趾得神機鎗礮法特置神機營肄習製用生熟赤銅相間其用鐵者建鐵柔爲最西鐵次之大小不等大者發用車次及小者用架用椿用托大利於守小利於戰隨宜而用爲行軍要器永樂十年詔自開平至懷來宣府萬全興和諸山頂皆置五礮架二十年從張輔請增置於山西大同天城陽和朔州等衛以禦敵然利器不可示人朝廷亦愼惜之宣德五年敕宣府總兵官譚廣神銃國家所重在邊墩堡量給以壯軍威勿輕給正統六年邊將黃

眞楊洪立神銃局於宣府獨石帝以火器外造恐傳習漏泄敕止之正統末邊備日亟御史楊善請鑄兩頭銅銃景泰元年巡關侍郎江潮言眞定藏都督平安火傘上用鐵槍頭環以響鈴置火藥筭三發之可潰敵馬應州民師翺製銃有機頃刻三發及三百步外俱試驗之天順八年延綏叅將房能言麓川破賊用九龍筒一線然則九箭齊發請頒式各邊至嘉靖八年始從右都御史汪鉉言造佛郎機礮謂之大將軍發諸邊鎮佛郎機者國名也正德末其國舶至廣東白沙巡檢何儒得其制以銅爲之長五六尺大者重千餘斤小者百五十斤

巨腹長頸腹有修孔以子銃五枚貯藥置腹中發及百餘丈最利水戰駕以蜈蚣船所擊輒縻碎二十五年總督軍務翁萬達奏所造火器兵部試之言三出連珠百出先鋒鐵捧雷飛俱便用母子火獸布地雷礮止可夜劫營御史張鐸亦進十眼銅礮大彈發及七百步小彈百步四眼鐵鎗彈四百步詔工部造萬曆中通判華光大奏其父所製神異火器命下兵部其後大西洋船至復得巨礮曰紅夷長二丈餘重者至三千斤能洞裂石城震數十里天啓中錫以大將軍號遣官祀之崇禎時大學士徐光啓請令西洋人製造發各鎮然將帥多不

得人城守不固有委而去之者及流寇犯闕三大營兵
不戰而潰鎗礮皆爲賊有反用以攻城城上亦發礮擊
賊時中官已多異志皆空器貯藥取聲震而已明置兵
仗軍器二局分造火器號將軍者自大至五又有奪門
將軍大小二樣神機礮襄陽礮蓋口礮椀口礮旋風礮
流星礮虎尾礮石榴礮龍虎礮毒火飛礮連珠佛郎機
礮信礮神礮礮裏礮十眼銅礮三出連珠礮百出先鋒
礮鐵棒雷飛礮火獸布地雷礮椀口銅鐵銃手把銅鐵
銃神銃斬馬銃一窩鋒神機箭銃大中小佛郎機銅銃
佛郎機鐵銃木廂銅銃筋繳樺皮鐵銃無敵手銃鳥嘴

明史紀事本末卷之三
銃七眼銅銃千里銃四眼鐵鎗各號雙頭鐵鎗夾把鐵手鎗快鎗以及火車火傘九龍筒之屬凡數十種正德嘉靖間造最多又各邊自造自正統十四年四川始其他刀牌弓箭槍弩狼筓蒺藜甲冑戰襖在內有兵仗軍器鍼工鞍轡諸局屬內庫掌於中官在外有盛甲厰屬兵部掌以郎官京省諸司衛所又俱有雜造局軍資器械名目繁夥不具載惟火器前代所少故特詳焉

中原用車戰而東南利舟楫二者於兵事爲最要自騎兵起車制漸廢洪武五年造獨轅車北平山東千輛山西河南八百輛永樂八年北征用武剛車三萬輛皆惟

以供餽運至正統十二年始從總兵官朱冕議用火車
備戰自是言車戰者相繼十四年給事中李侃請以羸
車千輛鐵索聯絡騎卒處中每車翼以刀牌手五人賊
犯陣刀牌手擊之賊退則開索縱騎帝命造成祭而後
用下車式於邊境用七馬駕寧夏多溝壑總兵官張泰
請用獨馬小車時以爲便箭工周四章言神機鎗一發
難繼請以車載鎗二十箭六百車首置五鎗架一人推
二人扶一人執爨試可乃造景泰元年定襄伯郭登請
倣古制爲偏箱車轅長丈三尺濶九尺高七尺五寸箱
用薄板置銃出則左右相連前後相接鈎環牽互車載

衣糧器械并鹿角二屯處十五步外設爲藩每車鎗礮
弓弩刀牌甲士共十人無事輪番推挽外以長車二十
載大小將軍銃每方五輛轉輸樵採皆在圍中又用四
輪車一列五色旗視敵指揮廷議此可以守難於攻戰
命登酌行蘭州守備李進請造獨輪小車上施皮屋前
用木板畫獸面鑿口置椀口銃四鎗四神機箭十四樹
旗一行爲陣止爲營二年吏部郎中李賢請造戰車長
丈五尺高六尺四寸四圍箱板穴孔置銃上闢小牕每
車前後占地五步以千輛計四方可十六里芻糧器械
輜重咸取給焉帝令亟行成化二年從郭登言製軍隊

小車每隊六輛輻九人二人挽七人番代車前置牌畫
猊首遠望若城壘然八年寧都諸生何京上禦敵車式
上施鐵網網穴發鎗弩行則斂之五十車爲一隊用士
三百七十五人十二年左都御史李賓請造偏箱車與
鹿角參用兵部尚書項忠請驗閱以登高涉險不便已
之十三年從甘肅總兵官王璽奏造雷火車中立樞軸
旋轉發礮二十年宣大總督余子俊以車五百輛爲一
軍每輛卒十人車隙補以鹿角旣成而遲重不可用時
人謂之鷓鴣軍弘治十五年陝西總制秦紘請用隻輪
車名曰全勝長丈四尺上下共六人可衝敵陣十六年

閒住知府范吉獻先鋒霹靂車嘉靖十一年南京給事中王希文請倣郭固韓琦之制造車前銳後方上置七鎗爲櫓三層各置九牛神弩傍翼以卒行載甲兵止爲營陣下邊鎮酌行十五年總制劉天和復言全勝車之便而稍爲損益用四人推挽所載火器弓弩刀牌以百五十斤爲準箱前畫狻猊旁列虎盾以護騎士命從其制四十三年有司奏准京營教演兵車共四千輛每輛步卒五人神鎗夾靶鎗各二自正統以來言車戰者如此然未嘗一當敵至隆慶中戚繼光守薊門奏練兵車七營以東西路副總兵及撫督標共四營分駐建昌遵

化石匣密雲薊遼總兵二營駐三屯昌平總兵一營駐昌平每營重車百五十有六輕車加百步兵四千騎兵三千十二路二千里間車騎相兼可禦敵數萬穆宗踐之命給造費然特以遏衝突施火器亦未嘗以戰也是後遼東巡撫魏學會請設戰車營倣偏箱之制上設佛郎機二下置雷飛礮快鎗六每車步卒二十五人萬曆末經略熊廷弼請造雙輪戰車每車火礮二翼以十卒皆持火鎗天啓中直隸巡按御史易應昌進戶部主事曹履吉所製鋼輪車小衝車等式以禦敵皆罕得其用大約邊地險阻不利車戰而舟楫之用則東南所宜舟

之制江海各異太祖於新江口設船四百永樂初命福建都司造海船百三十七又命江楚兩浙及鎮江諸府衛造海風船成化初濟川衛楊渠獻槳舟圖皆江舟也海舟以舟山之烏槽爲首福船耐風濤且禦火浙之十裝標號軟風蒼山亦利追逐廣東船鐵栗木爲之視福船尤巨而堅其利用者二可發佛郎機可擲火毬大福船亦然能容百人底尖上濶首昂尾高柁樓三重帆桅二傍護以板上設木女牆及礮牀中爲四層最下實土石次寢息所次左右六門中置水櫃揚帆炊爨皆在是最上如露臺穴梯而登傍設翼板可憑以戰矢石火器

皆俯發可順風行海蒼視福船稍小開浪船能容三五
十人頭銳四槳一櫓其行如飛不拘風潮順逆艫艫船
視海蒼又小蒼山船首尾皆濶帆櫓竝用櫓設船傍近
後每傍五枝每枝五跳跳二人以板閘跳上露首於外
其制上下三層下實土石上爲戰場中寢處其張帆下
旋皆在上層戚繼光云倭舟甚小一入裏海大福海蒼
不能入必用蒼船逐之衝敵便捷溫人謂之蒼山鐵也
沙鷹二船相胥成用沙船可接戰然無翼蔽鷹船兩端
銳進退如飛傍釘大茅竹竹間牕可發銃箭牕內舳外
隱人以盪槳先駕此入賊隊沙船隨進短兵接戰無不

勝漁船至小每舟三人一執布帆一執槳一執鳥嘴銃隨波上下可掩賊不備網梭船定海臨海象山俱有之形如梭竹桅布帆僅容二三人遇風濤輒舁入山麓可哨探蜈蚣船象形也能駕佛郎機銃底尖面濶兩傍楫數十行如飛兩頭船旋轉在舵因風四馳諸船無逾其速蓋自嘉靖以來東南日備倭故海舟之制特詳備云明制馬之屬內廐者曰御馬監中官掌之牧於大壩蓋倣周禮十有二閑意牧於官者爲太僕寺行太僕寺苑馬寺及各軍衛卽唐四十八監意牧於民者南則直隸應天等府北則直隸及山東河南等府卽宋保馬意其

曰備養馬者始於正統末選馬給邊邊馬足而寄牧於畿甸者也官牧給邊鎮民牧給京軍皆有孳生駒官牧之地曰草場或爲軍民佃種曰熟地歲徵租佐牧人市馬牧之人曰恩軍曰隊軍曰改編軍曰充發軍曰抽發軍苑馬分三等上苑萬中七千下四千一夫牧馬十匹五十夫設圍長一人凡馬肥瘠登耗籍其毛齒而時省之三歲寺卿偕御史印烙鬻其羸劣以轉市邊衛營堡府州縣軍民壯騎操馬則掌於行寺卿邊用不足又以茶易於番以貨市於邊其民牧皆視丁田授馬始曰戶馬旣曰種馬按歲徵駒種馬死孳生不及數輒賠補此

其大凡也初太祖都金陵令應天太平鎮江廬州鳳陽揚州六府滁和二州民牧馬洪武六年設太僕寺於滁州統於兵部後增滁陽五牧監領四十八羣已爲四十監旋罷惟存天長大興舒城三監置草場於湯泉滁州等地復令飛熊廣武英武三衛五軍養一馬馬歲生駒一歲解京旣而以監牧歸有司專令民牧江南十一戶江北五戶養馬一復其身太僕官督理歲正月至六月報定駒七月至十月報顯駒十一月報重駒歲終考馬政以法治府州縣官吏凡牡曰兒牝曰騾兒一騾四爲羣羣頭一人五羣羣長一人三十年設北平遼東山

西陝西甘肅行太僕寺定牧馬草場永樂初設太僕寺於北京掌順天山東河南舊設者爲南太僕寺掌應天等六府二州四年設苑馬寺於陝西甘肅統六監監統四苑又設北京遼東二苑馬寺所統視陝西甘肅十二年令北畿民計丁養馬選居閒官教之畜牧民十五丁以下一匹十六丁以上二匹爲事編發者七戶一匹得除罪尋以寺卿楊砥言北方人戶五丁養一免其田租之半薊州以東至南海等衛戍守軍外每軍飼種馬一又定南方養馬例鳳廬揚滁和五丁一應天太鎮十丁一淮徐初養馬亦以丁爲率十八年罷北京苑馬寺悉

牧之民洪熙元年令民牧二歲徵一駒免草糧之半自是馬日蕃漸散於隣省濟南兗州東昌民養馬自宣德四年始也彰德衛輝開封民養馬自正統十一年始也已而也先入犯取馬二萬寄養近京充團營騎操而盡以故時種馬給永平等府景泰三年令兒馬十八歲騾馬二十歲以上免算駒成化二年以南土不產馬改徵銀四年始建太僕寺常盈庫貯備用馬價是時民漸苦養馬六年吏部侍郎葉盛言向時歲課一駒而民不擾者以芻牧地廣民得爲生也自豪右莊田漸多養馬漸不足洪熙初改兩年一駒成化初改三年一駒馬愈削

民愈貧然馬卒不可少乃復兩年一駒之制民愈不堪
請敕邊鎮隨俗所宜凡可以買馬足邊軍民交益者便
宜處置時馬文升撫陝西又極論邊軍償馬之累請令
屯田卒田多丁少而不領馬者歲輸銀一錢以助賠償
雖皆允行而民困不能舒也繼文升撫陝者蕭禎請省
行太僕寺兵部覆云洪永時設行太僕及苑馬寺凡茶
馬番人貢馬悉收寺苑放牧常數萬匹足充邊用正統
以後北敵屢入抄掠馬遂日耗言者每請裁革是惜小
費而忘大計於是敕諭禎但令加意督察而北畿自永
樂以來馬日滋輒責民牧民年十五者卽養馬太僕少

卿彭禮以戶丁有限而課駒無窮請定種馬額會文升爲兵部尚書奏行其請乃定兩京太僕種馬兒馬二萬五千騾馬四之二年納駒著爲令時弘治六年也十五年冬尚書劉大夏薦南京太常卿楊一清爲副都御史督理陝西馬政一清奏言我朝以陝右宜牧設監苑跨二千餘里後皆廢惟存長樂靈武二監今牧地止數百里然以供西邊尚無不足但苦監牧非人牧養無法耳兩監六苑開城安定水泉便利宜爲上苑牧萬馬廣寧萬安爲中苑黑水草場逼窄清平地狹土瘠爲下苑萬安可五千廣寧四千清平二千黑水千五百六苑歲給

軍外可常牧馬三萬二千五百足供三邊用然欲廣孳息必多蓄種馬宜增滿萬匹兩年一駒五年可足前數請支太僕馬價銀四萬二千兩於平慶臨鞏買種馬七千又養馬恩隊軍不足請編流亡民及問遣回籍者且視恩軍例凡發邊衛充軍者改令各苑牧馬增爲三千人又請相地勢築城通商種植榆柳春夏放牧秋冬還廐馬旣得安敵來亦可收保孝宗方重邊防大夏掌兵部一清所奏輒行遷總制仍督馬政諸監草場原額十三萬三千七百餘頃存者已不及半一清覈之得荒地十二萬八千餘頃又開武安苑地二千九百餘頃正德

二年間於朝及一清去官未幾復廢時御史王濟言民苦養馬有一孳生馬輒害之間有定駒賂醫諱之有顯駒墜落之馬虧欠不過納銀二兩旣孳生者已聞官而復倒斃不過納銀三兩孳生不死則饑餓馬日瘦削無濟實用今種馬地畝人丁歲取有定額請以其額數令民買馬而種馬孳生縣官無與兵部是其言自後每有奏報輒引濟言縣官無與種馬事但責駒於民遺母求子矣初邊臣請馬太僕寺以見馬給之自改徵銀馬日少而請者相繼給價十萬買馬萬匹邊臣不能市良馬馬多死太僕卿儲燿以爲言請仍給馬又指陳各邊種

馬盜賣私借之弊語雖切不能從而邊鎮給發日益繁
延綏三十六營堡自弘治十一年始十年間發太僕銀
二十八萬有奇買補四萬九千餘匹寧夏大同居庸關
等處不與焉至正德七年遂開納馬例凡十二條九年
復發太僕銀市馬萬五千於山東遼東河南及鳳陽保
定諸府嘉靖元年陝西苑馬少卿盧璧條上馬政請督
逋負明印烙訓醫藥均地差以救目前而闢場廣蓄爲
經久計帝嘉納之自後言馬事者頗衆大都因事立說
補救一時而已二十九年俺荅入寇太僕馬缺復行正
德納馬例已稍增損之至四十一年遂開例至捐馬授

職隆慶二年提督四夷館太常少卿武金言種馬之設
專爲孳生備用備用馬旣別買則種馬可遂省今備用
馬已足三萬宜令每馬折銀三十兩解太僕種馬盡賣
輸兵部一馬十兩則直隸山東河南十二萬匹可得銀
百二十萬且收草豆銀二十四萬御史謝廷傑謂祖制
所定關軍機不可廢兵部是廷傑言而是時內帑乏方
分使括天下逋賦穆宗可金奏下部議部請養賣各半
從之太僕之有銀也自成化時始然止三萬餘兩及種
馬賣銀日增是時通貢互市所貯亦無幾及張居正作
輔力主盡賣之議自萬曆九年始上馬八兩下至五兩

又折徵草豆地租銀益多以供團營買馬及各邊之請
然一騶馬輒發三十金而州縣以駑馬進其直止數金
且仍寄養於馬戶害民不減曩時又國家有興作賞賚
往往借支太僕銀太僕帑益耗十五年寺卿羅應鶴請
禁支借二十四年詔太僕給陝西賞功銀寺臣言先年
庫積四百餘萬自東西二役興僅餘四之一朝鮮用兵
百萬之積俱空今所存者止十餘萬况本寺寄養馬歲
額二萬匹今歲取折色則馬之派徵甚少而東征調兌
尤多卒然有警馬與銀俱竭何以應之章下部未能有
所釐革也崇禎初核戶兵工三部借支太僕馬價至一

千三百餘萬蓋自萬曆以來罔政太壞而邊牧廢弛愈不可問旣而遼東督師袁崇煥以缺馬請於兩京州縣寄養馬內折三千匹價買之西邊太僕卿徐國鼎言祖宗令民養馬專供京營騎操防護都城非爲邊也後來改折無事則易馬輸銀有警則出銀市馬仍是爲京師備禦之意今折銀已多給各鎮如并此馬盡折萬一變生奈何帝是其言却崇煥請按明世馬政法久弊叢其始盛終衰之故大率由草場興廢太祖旣設草場於大江南北復定北邊牧地自東勝以西至寧夏河西察罕腦兒以東至大同宣府開平又東南至大寧遼東抵鴨

緣江又北千里而南至各衛分守地又自雁門關西抵黃河外東歷紫荊居庸古北抵山海衛荒閒平埜非軍民屯種者聽諸王駙馬以至近邊軍民樵採牧放在邊藩府不得自占永樂中又置草場於畿甸尋以順聖川至桑乾河百三十餘里水草美令以太僕千騎令懷來衛卒百人分牧後增至萬二千匹宣德初復置九馬坊於保安州於是兵部奏馬大蕃息以色別而名之其毛色二十五等其種三百六十其後莊田日增草場日削軍民皆困於孳養弘治初兵部主事湯冕太僕卿王霽給事中韓祐周旋御史張淳皆請清覈而旋言香河諸

縣地占於勢家霸州等處俱有仁壽宮皇莊乞罷之以益牧地雖允行而占佃已久卒不能清南京諸衛牧場亦久廢兵部尚書張鑒請復之御史胡海言恐遺地利遂止京師團營官馬萬匹與旗手等衛上直官馬皆分置草場歲春末馬非聽用者坐營官領下場放牧草豆住支秋末回給事御史閱視馬斃軍逃者以聞後上直馬不出牧而騎操馬仍歲出如例嘉靖六年武定侯郭勛以邊警爲辭奏免之徵各場租以充公費餘貯太僕買馬於是營馬專仰秣司農歲費至十八萬戶部爲詘而草場益廢議者爭以租佃取贏浸淫至神宗時弊壞

極矣茶馬司洪武中立於川陝聽西番納馬易茶賜金牌信符以防詐僞每三歲遣廷臣召諸番合符交易上馬茶百二十觔中馬七十觔下馬五十觔以私茶出者罪死雖勛戚無貸末年易馬至萬三千五百餘匹永樂中禁稍弛易馬少乃命嚴邊關茶禁遣御史巡督正統末罷金牌歲遣行人巡察邊氓冒禁私販者多成化間定差御史一員領贖專理弘治間大學士李東陽言金牌制廢私茶盛有司又屢以敝茶給番族番人抱憾往往以羸馬應宜嚴敕陝西官司揭榜招諭復金牌之制嚴收良茶頗增馬直則得馬必蕃及楊一清督理苑馬

遂命井理鹽茶一清申舊制禁私販種官茶四年間易馬九千餘匹而茶尚積四十餘萬觔靈州鹽池增課五萬九千貯慶陽固原庫以買馬給邊又懼後無專官制終廢也於正德初請令巡茶御史兼理馬政行太僕苑馬寺官聽其提調報可御史翟唐歲收茶七十八萬餘觔易馬九千有奇後法復弛嘉靖初戶部請揭榜禁私茶凡引俱南戶部印發府州縣不得擅印三十年詔給番族勘合然初制訖不能復矣馬市者始永樂間遼東設市三二在開原一在廣寧各去城四十里成化中巡撫陳鉞復奏行之後至萬曆初不廢嘉靖中開馬市於

大同陝邊宣鎮相繼行隆慶五年俺答上表稱貢總督王崇古市馬七千餘匹爲價九萬六千有奇其價遼東以米布絹宣大山西以銀市易外有貢馬者以鈔幣加賜之初太祖起江左所急惟馬屢遣使市於四方正元壽節內外藩封將帥皆以馬爲幣外國土司番部以時入貢朝廷每厚加賜予所以招攜懷柔者備至文帝勤遠畧遣使絕域外國來朝者甚衆然所急者不在馬自後徃於承平駕馭之權失馬無外增惟恃孳生歲課重以官吏侵漁牧政荒廢軍民交困矣蓋明自宣德以後祖制漸廢軍旅特甚而馬政其一云

明史卷九十二終